

MARKO Kalε Wĩ a Nδε Ayekĩ Marko Tsελε Ke a

Yohanes Mui Ɔwɔlanε a De Letsã Ne Kalε Wĩ a Akũ.

^I Ade Kalε Wĩ ne Yesu Kristo kĩ enye Baguma obi akũ kayɔkayi a.

^{II} Anε kɔkɔε a mɔ Baguma Onukpě Ɔnyεne Yesaya tsελε eyi kĩ Baguma bi ye obi kĩ,
“Maado yĩ fɔtɔ ɔnyane enya nɔ lɔtɔ,
ɛyaalɔla osi eyi εkpa nɔ.

^{III} Aanu kĩ oti kĩ tɛ tɛ yade letsã ne kɔsa kame kalε kĩ,

‘Mimanε osi mikpa Ɔlate a kaya.

Mikena osi a eyo kpĩ.’ ”

^{IV} Fɔtɔ Ɔnyane kĩ nye Yohanes kĩ εna ne kɔsa kame εkawɔla bati mui ne ɔwɔ kame nδε ayekĩ Yudafo akena a. Emini ede letsã kĩ bati bedani be tɔwɔle kame, betε mui kawɔla amanie a, lɔkɔa Baguma aakɔa be titikpa ete be. ^V Bati pii to Yudea tite a akũ mɔ be ɔmato kpale kĩ bave Yerusalem, benaa kɔsa a kame, kĩ banaatse Yohanes ɔledo. Bibinya be tɔkpa kame betsa Baguma, ade Yohanes wɔla be mui ne Yordan ɔwɔ kame a.

^{VI} Lɔkɔ a na kame ni, Yohanes do ɔponkɔ mɔ kanε mɔ lɔpɔ tɔlɔ tetadie, εkɔa ɔyae ovoli ɔwě εbɔa kate. Ye funitsã nye kɔsã mɔ koolo.

^{VII} Ede letsã kĩ, “Oti a kĩ yaaya ne yĩ liti a, εbě yĩ kɔlaa kĩ ntáfeta kĩ makena akũ nwũnya mpabua

ne ye aboa malo. ^{VIII} Yī kō mui nkōa makena mui kawōla amanie, leme ye kō yaakoa Hūhū Kpalēwa ewōla mi mui.”

Yohanes Wōla Yesu Mui.

^{IX} Owi tábuna mō Yesu to Nazaret omato ne Galilea tite akū, eyate Yohanes mui kawōla amanie a ne Yordan owō kame. ^X Kī Yesu sila ené eto mui a kame a, emō kī odetó kame binya ade Hūhū a ka eko ne ye akū nde ayekī mbloduma aka a. ^{XI} Ade oledo ne eto ode ele kī, “Nō nye yī obi kī maátunō kale, kawōle ade yī ne nō akū.”

^{XII} Letaleta Hūhū Kpalēwa a kpā Yesu enamena kōsa kame ne awā kī tuwī kame bayae deī. ^{XIII} Ye odi ena ne awā fuwi tēna. Lōkō a na kame a, Abonsam sō Yesu edā, ade ode foto banyane yasum ye a.

Yesu Nye Ye Fōtsa Bakōlene Batōnyade.

^{XIV} Lōkō a kī bipi Yohanes bido ne kōla kame a, Yesu dzakū enaa Galilea enale Baguma Kale Wī a ne awā.

^{XV} Ekale ne awā kī, “Lōkō wī a wo oto ade Baguma legākanya lōkō a fuā. Mimuniki ne mi tokpa liti lōkōa mite Kale Wī a mido!”

^{XVI} Kī Yesu kamini ne owō lutubu baū owē ne Galilea tite akū a, emō kofobi banyene nviā kī benye Simon mō owaē Andrea, bekata be tesau.

^{XVII} Ade Yesu bi be kī, “Miyaatomō yī, lōkōa maakena mi bati banyene.” ^{XVIII} Ne awā naa, befone be tesau awe biyidza bitomō ye.

^{XIX} Kī benaa lotō sukuloo a, emō bawaē nviā Yakobo mō Yohanes. Bena ne be okolo kame bekalola be tesau. ^{XX} Kī Yesu mō be a, eve be deedimōape kī bitomō ye. Be malo biyidza

letaleta, befone be olega Zebedeo mo ye adzuma bakenane a odi ne okolo a kame, ade bitomo Yesu a.

Yesu Blomena Huhũ Kpa Etomena Oti Odi Kame.

^{XXI} Yesu mo bikĩ bitomo ye a nawo omato kĩ bave Kapernaum. Ne Yudafõ Kaweya Luwi a kĩ litomo be awã kawo luwi a, Yesu naa Yudafõ katsenakõ enatsa fotsa. ^{XXII} Bati a kĩ binu ye fotsa katsa a kena saa, kitonekĩ fõvemena ne Yudafõ mbla batsane a fude akũ, mbom ye etsa fotsa mo owole kame kobẽ.

^{XXIII} Ne loko a na kame a, onyole odi kĩ huhũ kpa deĩ ne ye kame na ne be katsenakõ a, ^{XXIV} ade ebõa fowola koõba kĩ, “Yesu Nazaretni, litsa deĩ ne bomõ nõ kayite? Oya kĩ ayaawola boe mbõee? Ìnyina oti a kĩ ane. Nõ nye Baguma Oti Kpalewa Kĩ Bido a.”

^{XXV} Yesu wũni ne huhũ a akũ kĩ, “Sua onukpẽ, kanne ne oti a kame.” ^{XXVI} Huhũ a fufulinya oti a mo osĩ, efõ ebõa fowola koõba ade ene ne ye kame a.

^{XXVII} Fokena bati a flee kĩ bedza ne awã saa, ade bivia be akũ kĩ, “Litsa ne awĩ a? Ei! Fotsa katsa võẽ odabe ne awĩ a? Oti kũ deĩ kobẽ yawũni ne huhũ kpa akũ ade yatse ye oledo a!” ^{XXVIII} Foesũ Yesu dĩ gba ne Galilea tite akũ flee.

Yesu Tsa Bati Beblebee Fõso.

^{XXIX} Yesu mo ye fotsa bakolene, Yakobo mo Yohanes dzakũ ne Yudafõ katsenakõ a, ade benaa Simon mo Andrea toto kame a. ^{XXX} Kĩ biwo awã a, badi bi Yesu kĩ Simon nyina waa yaso, ye akũ bo hlihlihi. ^{XXXI} Foesũ Yesu wo ne ye sekẽ, ade

epi ye ne kòkpò edzela ye kī eyidza. Deedimòape fòso a dò ye, ade eyidza esum be a.

XXXII Kī suwa tomu a, bati kpā basone pii mò bikī hūhū kpa deī ne be kame a beyamena kī Yesu etsa be. XXXIII Bati ne omato a kame yaboa obū ne onyukpē. XXXIV Yesu tsa bati pii kī baso fòso ahòlo ahòlo, ade eblomèna hūhū kpa etomèna bati pii lemè kame a. Yesu tákpa hūhū a osi bele kodzela kitonekī binyina ye.

Yesu Le Kale Wī a Ne Galilea Tite Akū.

XXXV Odenyinawi a, Yesu yidza ne tòtò a kame, ene ne omato a kame enaa awā kī oti odima táfuā, enaboa mpaè.

XXXVI Lemè Simon mò bikī bitomò ye a ne betšè bawè Yesu. XXXVII Kī bemó ye a, bibi ye kī, “Odi nye odi lamèna nò kawè!”

XXXVIII Lemè Yesu bi be kī, “Mifō bonaa tukula bebā kī tifuā a lemè kame. Kefeta kī mabi be malo Baguma foletsà, kitonekī ade foesū ìya ne katinya kame a.”

XXXIX Foesū enamini ne Galilea flee. Etsā ekale Baguma foletsà a ne Yudafo fòtsenakō, ade ekablomèna hūhū kpa kanemèna ne bati kame a.

Yesu Tsa Onyole Odi Kī Yaso Fòso Ngbā.

XL Oti odi kī yaso fòso ngbā kī bati avila ya ne Yesu sèkē. Ekèna akū ade eke Yesu aduli kī ebumò ye a. Onyole a bi ye kī, “Nte awe ni, aapuli ofō fòso kī lewò ne yī akū.”

XLI Ye foletsà kò Yesu konya, foesū eyo awe eta ye. Ebi ye kī, “Mawè lomò. Nò akū ekpale.”

XLII Deedimòape fòso a wò ne ye akū.

XLIII Awã naa, Yesu bi ye kī edzakū moatse enaa, lemε esi ye mbla mo osī mo osī kī, XLIV “Tafō odza ne osi okabi bati letsa a kī de leya, mbom naa kpī, kakoa no akū kanaatsa osofō. Bōa afolie a kī Mose mbla tsa a, ayekī odi nye odi aanyi kī no akū kpale.”

XLV Lemε kī oti kī dzakū a, enado foletsa a kagbamena awe, ekabi bati flee ayekī Yesu tsa ye a. Ne foesū, Yesu tápuli ebuki ewo ne omato odima kame, ade ekana ne tuwī kame a. Lemε bati buki bekato kako nye kako kaya ne ye sekē.

II

Yesu Tsa Oti Odi Kī Eveliveli.

I Fuwi fudi liti a, Yesu muniki enaa Kapernaum, ade owi tábuna mo bati nu ye nkā kī eya ne toto kame a. II Foesū bati yayi toto a kī te kame edeī a mo kanya flee, ade ekatsa be Baguma foletsa a. III Ade awã naa mo bati ena lo oti odi kī eveliveli bema ye a. IV Kī betápuli betsä onyukpě ne bati lidede sū ni, bide ne kola ode benye oke ne kako kadi, ade bekena osone a mo okena biyi ne Yesu ane kame a. V Kī Yesu mó be katekado sū ni, ebi oti a kī eveliveli a kī, “Obi, bekoa no titikpa bite no.”

VI Lemε Yudafo mbla batsane a kī bena ne awã kakona ne be kame kī, VII “Nde sū yale fubusuotsa lomō? Baguma odi aapuli ekoa titikpa ete.”

VIII Yesu nyi be kakona a foesū ebi be kī, “Litsa sū fukī aha mi ne mi kame? IX Fōodabe deī osī fobē kī baabi oti kī eveliveli kī, ‘Bekoa no titikpa bite no,’ iye kī, ‘Yidza, bōe no okena katsā?’ X Kī

míanyi kī Otidziwa Obi a deī kōbē ne katinya kīī kame kī yakoa bati titikpa kate sū ni,” Yesu bi oti a kī eveliveli a kī, ^{XI} “Yidza, bōe nō okena kanaa kōla.” ^{XII} Letaleta oti a yidza ebōe ye okena ene ne bati a kī bedzē ne awā ane. Fōtsa a kēna bati a flee wāwā, ade bimu Baguma, bele kī, “Botámō fōtsa kīī odu tō.”

Yesu Vē Levi Kī Eyatomō Ye.

^{XIII} Yesu buki edzakū enaa Galilea owo lutubu baū abuī a. Bati pii ya ne ye sekē ne awā ade etsa be Baguma fōletsa a. ^{XIV} Kī edzakū yanaa a emó ogole otene Levi, Alfeo obi kī edzi ne ogole katekō. Ade Yesu bi ye kī, “Tomō yī.” Adeke Levi yidza ade etomō ye a.

^{XV} Ke liti a, Yesu mō ye fōtsa bakolene a mō bati pii kī bitomō ye a naanya ne Levi awā. Tōgole batene mō tōkpa bakenane pii leme na ne kanyakō a mō be. ^{XVI} Ade Farisifō kī benye Yudafō mbla batsane badi leme na ne awā a. Kī Farisifō mbla batsane a mō kī Yesu anya mō titikpa bakenane mō tōgole batene a, bivia ye fōtsa bakolene a kī, “Litsa sū yanya kamōa mō tōgole batene mō tōkpa bebā bakenane?”

^{XVII} Kī Yesu nu fōletsa kīī a, ebi be kī, “Bati kī bideī akū osī tāsī tutsonu okenane, mbom basone lisī ye. Ntāya kī mayaave bati kpīī, mbom tōkpa bakenane kave iya.”

Yesu Tsa Fōtsa Ne Onukpē Kasui Akū.

^{XVIII} Ne loko lidi kame, kī Yohanes mō ye fōtsa bakolene mō Farisifō kasui onukpē a, bati badi ya ne Yesu sekē bivia ye kī, “Nde sū nō fōtsa

bakolene a lásui onukpě nde Yohanes bade mo Farisifo a aye?"

XIX Yesu kpa be mbuaye kī, “Mbɔɛɛ obolitsɔ onyo bakɔba aapuli bidzi kɔle ne obolitsɔ kapikɔ ne lokɔ a kī obolitsɔ onyo a deī ne be sekě a?”

XX Leme luwi lidi aaya kī baakpā ye ne ye bakɔba a sekě, lokɔa baasui onukpě ne fuwi a kame.

XXI Odima lákɔa limakū vɔě katae ɔke ne lima kɔe akū. Limakū vɔě a aabě lokɔe lidomo akū nte bevole de, ade fɔafɔ ɔke baū lewa eba ayekī fona kɔkɔe a. **XXII** Bio, odima lákɔa waī vɔě kako ne ɔyae ovoli kuvū kɔe kame, kitonekī waī vɔě aabě kuvū kɔe a, lokɔa waī a aawula, kuvū a leme aabu kade. Mbom bakɔa waī vɔě kako ne ɔyae ovoli kuvū vɔě kame.”

Fɔletsa Kavia Ne Kaweya Luwi a Akū.

XXIII Ne Kaweya Luwi lidi akū a, kī Yesu mo ye fɔtsa bakolene tsě batě ne fugbano kɔba kudi kame a, fɔtsa bakolene a kave fudi. **XXIV** Foesū Farisifo a bi Yesu kī, “Dā! Boe mbla tákpa osi kī bakena fukīnaa ne Kaweya Luwi akū.”

XXV-XXVI Awā naa Yesu via be kī, “Mitákā letsa a kī Legā Dawid kena a? Lokɔ a kī kɔle kɔ ye mo bikī bitomo ye a, Dawid wo ne Baguma kɔla a kame a, ne lokɔ a kī Abiata anya Yudafɔ ɔsɔfɔnɔkɔě Flee a. Enanye afolibɔ abodoo kī Yudafɔ basofɔ odi deī osi kī banya a enya, ade ekɔa adi ekpa bikī bitomena ye a leme benya a.”

XXVII Yesu bi be kī, “Otidziwa sū bebɔa Kaweya Luwi a, nné Kaweya Luwi a sū bebɔa otidziwa. **XXVIII** Foesū Otidziwa Obi a nye Kaweya Luwi a ɔlate.”

III

Yesu Tsa Oti Odi Kĩ Ye Awe Gogolo Ne Kaweya Luwi Akũ.

^I Ke liti a, Yesu buki enaa Yudafɔ katsenakɔ kadi. Oti odi kĩ ye kɔkɔ ku na ne awã.

^{II} Lokɔ a na Yesu bakesĩne badi na ne katsenakɔ a, bekadã nte yaatsa oti a ne Kaweya Luwi akũ, ayekĩ baabɔe fɔletsã ne ye akũ.

^{III} Yesu ve oti a kĩ ye kɔkɔ ku a kĩ ene eyaadza ne bati a flee ane kame. ^{IV} Ade edani etselamɔ bati a evia be kĩ, “Mbla kpa osi kĩ bekena tuwĩ ne Kaweya Luwi akũ, mbɔee bekena tokpa? Fonye luwi kĩ bate oti nkpã, mbɔee kĩ befɔne ye awe eku” Lemɛ betãle kadima. ^V Yesu dã be etẽmena ne kalokpa kame, ade fɔha ye paa ne be lolɔ kame osĩ sũ a. Ade ebi osone a kĩ, “Yo nɔ awe.” Eyo awe a ade ye awe a de osĩ a. ^{VI} Adeke Farisifo a dzakũ benamɔ Legã Herodes batomenane a, ade bipi adzuni ne Yesu kakɔ akũ a.

Yesu Tsa Bati Pii Ne Galilea Owɔ Lutubu Baũ a Abuĩ.

^{VII-VIII} Yesu mɔ ye fɔtsã bakolene a naa Galilea owɔ lutubu baũ a abuĩ, ade bati beblebee tomɔ be beya a. Bito Galilea tite, Yudea tite, Yerusalem omato mɔ Idumea kamekame a, bikĩ bito Yordan Owɔ liti a, mɔ be a kĩ bito Tiro mɔ Sidon temato kamekame a beya. Bati kĩĩ flee ya ne Yesu sekẽ, kitonekĩ binu ye awãwã fɔtsã a kĩ etsẽ yakena a.

^{IX-X} Yesu tsa bati pii ade basone pii kapili kĩ bata ye lokɔa bena akũ osĩ a. Bati a lidede sũ ni, Yesu bi ye fɔtsã bakolene a kĩ bewɛ okolo odi bedzela ye, ayekĩ bati a lelãamenana ye. ^{XI} Nte bati a kĩ hũhũ kpa na ne be kame sila bemó Yesu

pe, bato ne ye aboa kayo kaboa fowola kī, “No nye Baguma Obi.” XII Leme Yesu sua be osi kī betafō bati linyi oti a kī ye yane.

Yesu Pau Foto Banyane Ewua-nviã.

XIII Ke liti a, Yesu de enaa oto kaletе. Ade awã enve bikī yawe kī benya ye bade a. XIV Bati kīi yakpota ne ye sekē ade epau be kame bati ewua-nviã, ete be dī kī foto banyane. Ebi be kī, “Mpau mi kī mina ne yī akū loko nye loko. Maado mi leme kī minaale Baguma foletsa a, XV ade míana kobē kī míablomena hūhū kpa mitomena bati kame a.”

XVI-XIX Bati ewua-nviã a kī enye a bui nye Simon, ade ye Yesu te dī kī Petro, Yakobo mo owaē Yohanes kī benye Zebedeo babi. Yesu ve be kī Boanerges, foe kayo nye kī bale kodzela mo kobē nde ayekī oplala akpēne a. Babebā nye Andrea, Filipino, Bartolomeo, Mateo mo Toma, Yakobo kī enye Alfeo obi, Tadeo, Simon kī eto Kana kī epili ye kade lolо a. Yuda Iskariot, oti kī ye lenye Yesu ekpa.

Yudafō Mbla Batsane Vūna Yesu.

XX Yesu dzakū ne awã enaa toto kame, ade bati pii buki beya ne be sekē ne awã. Ne foesū Yesu mo ye fotsa bakolene a lána aya benya malo. XXI Kī Yesu akū bati nu foe a, benaa kī banaakpā ye, kitonekī bati kale kī, “Ye lolо kame lamо kade kabu.” XXII Yudafō mbla batsane a kī bito Yerusalem beya a le kī, “Hūhū kpa deī ne ye kame. Hūhū kpa legā a lekpa ye kobē yablomena hūhū a katomena bati kame.”

XXIII Ade Yesu ve bati a eyamena ne ye sekē ele kodzela mo be ne fogbā kame kī, “Nde fōaya kī Abonsam aapuli eblomena ye moawe akū etomena oti kame? XXIV Foe nfantuhū nye kī nte legākanyakō kadi sē ke akū kutsu kutsu kī koano akū ni, kanyakō a na leláapuli kitim. XXV Ade ayea nte kola kudi sē koe akū kutsu kutsu mo tedze né ne be kame ni, kola na leláapuli kodza. XXVI Foesū nte Abonsam yidza edza ne ye moawe akū, mo ye kanyakō a sē kutsu kutsu ni, ye kanyakō a aayale lōkoa ade ye legā kanya a kawūna ne awā a.

XXVII “Odima leláapuli ewo ne oti kī edeī kobē kola kame enaafila ye fōtsa, mbōente enya loto esuli obelebe a fomo yaawo efila ye fōtsa a.

XXVIII “Mabi mi ne onokwali kame kī Baguma aakoa bati tokpa tidi nye tidi kī bekēna mo fubusuotsa fudi nye fudi kī bele ete be. XXIX Lemē odi nye odi kī yaale fubusuotsa ne Hūhū Kpalewa a akū ni, Baguma leláakoa ete ye da. Kitonekī ekēna tokpa kī taawa daa.”

XXX Yesu le fukī kitonekī Yudafo mbla batsane a badi le kī hūhū kpa deī ne ye kame.

Bawei Liti Benye Yesu Akū Bati?

XXXI Ke liti a, Yesu oma mo bawāenyole ya bedzē ne kanya ade bido loto kī beve ye eya.

XXXII Bati a kī bidzi betsena Yesu a bi ye kī, “Dā, ama mo awāē ame dzē ne kanya bawe no!”

XXXIII Ade Yesu via be kī, “Owei nye mma? Bawei nye nwaē ame?”

XXXIV Kī edā bati a kī bidzi bisinya ye enake a, ele kī, “Midā, ade mma mo nwaē ame ne awī

a! XXXV Odi nye odi kī yakena ne Baguma kawε akū ni, ade ye nye nwaēnyole mō nwaētsole, mō mma a.”

IV

Yesu Bɔa Legbā Ne Funitsā Babi Kasā Akū

^I Yesu buki enaa Galilea ɔwɔ lutubu baū a ɔwē, ade ekatsa Baguma fɔlets a. Ayekī bati pii foli ne ye akū sū ni, ewo edzi ne ɔkolo kī eteī ne mui anε kame. Bati dza ne ɔwɔ lutubu baū a abuī ade Yesu katsa be fɔtsa ne fɔgbā kame a. ^{II} Loko pii ne ye fɔtsa katsa kame a, ekɔa fɔgbā etsa fɔtsa a kī yawε kī etsa be a. Fɔtsa a kī etsa be a nye fukī.

^{III} Ebi be kī, “Mitse! Luwi a onyole odi naa kɔba enaasā funitsā babi. ^{IV} Kī ekasā foe a fudi tɔ ne osi ɔwē, ade kɔvɔlabi yafila be bemen a. ^V Badi tɔ ne lekpakpalabode akū, kī tite lelāa pii. Foesū babi a mε mɔatse. ^{VI} Lemε kī suwa ta kpaa pε beve biku, kitonekī be tunu tana funitsā, ne boe a sū. ^{VII} Badi tɔ ne tuwī mō fu nde ɔgɔabi kame. Tuwī mō fu mε fusuli be, kī betápuli bibo anε. Ne foesū betáwū babi. ^{VIII} Babi badi tɔ ne tite wī akū. Bemε bibo anε, ade biwū bido babi a. Badi do babi taale, badi aduesia, badi oha.”

^{IX} Ne kawūnakɔ a Yesu bi be kī, “Oti kī edeī ato ni, etse katse wī!”

Yesu Nye Legbā a Kayɔ Etsa Ye Fɔtsa Bakɔlene.

^X Kī Yesu odi na ne kakɔ mɔa a, bati a kī binu ye legbā a mō ye fɔtsa bakɔlene mō ye foto banyane a ya kī enye de kayɔ etsa be. ^{XI} Yesu bi be kī, “Baguma nye ye legākanya kame fɔtsa kolawa a etsa mi. Lemε bati a kī bite a ni, mbɔente fɔgbā

kame baakanu foletsa a. ^{XII} Foesũ fóaya ne foe kame nde ayekĩ Baguma onukpě banyene kame odi tsele eyi kĩ,

‘Baakadã, leme beláamɔ biyi osũ.

Baakatse leme beláanu foe kayo.

Kitonekĩ tito kĩ banu ñye bamɔ malo ni,

beláanu kayo mɔ

baadani bedã Baguma,

lokɔa ekɔa be titikpa ete be.’ ”

^{XIII} Ade Yesu via be kĩ, “Nte mitánu legbã kĩ kayo a, nde miákena fomɔ míanu fogbã bebã kayo? ^{XIV} Fɔtsa odune a nye oti kĩ etsě yale Baguma kale. ^{XV} Bati badi la nde babi a kĩ beto ne osi owě a. Nte binu pe lokɔa Abonsam yanye foe ne be folo kame. ^{XVI} Bati badi leme la nde babi a kĩ beto ne boe kame. Nte lokɔ a kĩ binu pe lokɔa kawole de be. ^{XVII} Leme kale a ke tunu láwo ne tite kame kawo wĩ. Be katekado adã lukũ. Nte bati liti katomena yawo ne kale kĩ akũ pe, baamuniki ne ke liti.

^{XVIII} “Ade bati badi leme la nde babi kĩ beto ne tuwĩ mɔ fu kame a. Be benye bati kĩ binu Baguma foletsa a, ^{XIX} leme katinya kame ohau, sika kawe mɔ sukena fowetsa yi be towole kame. Fɔtsa kĩ mena Baguma foletsa a, foesũ fɔáwũ babi.

^{XX} “Bati badi leme ate Baguma Kale a nde babi kĩ beto ne tite wĩ akũ. Bati kĩ te ke mɔ be owole flee. Luwi nye luwi, babo ane kane lolɔ kawũ babi beblebee. Bekena nde fudutsa a kĩ fɔawũ babi taale, ñye aduesia, ñye oha mɔa.”

Ɔsedza Lekenawa Nye Kĩ Yakpale Fɔkɔ.

XXI Yesu buki evia be kī, “Owei atena ɔsedza kakɔa loɔda katsa ye īye kakɔa ye kado ne mpa kayɔ? Nné ɔsedza otse akū bakɔa ye kate? **XXII** Letsa nye letsa kī bekɔa bekɔla a baanye de kanya, ade Baguma aabinya letsa nye letsa kī bisua a. **XXIII** Foesū nte mideī ato ni, mitse foe katse wī!”

XXIV Bio, Yesu bi be kī, “Miyi ato yededeede mitse letsa a kī mianu a. Kitonekī fɔtsa kakɔna odu a kī mikɔa mikɔna mikpa bati bebā a, ade foe odu Baguma leme aakɔa ekɔna ekpa mi a. **XXV** Bikī bekɔa be akū bekpa yī fɔtsa katsa a baakpa be kayɔkanu dzununuunu. Leme bikī baátse a ni, baate letsa a kī bideī a malo ne be awe.”

Yesu Le Kale Ne Kamɔne Libi Ane Kabo Akū.

XXVI Yesu buki ebi be kī, “Baguma legākanyakɔ a la nde oti kī yasā kamɔne. **XXVII** Luwi daa kī yawa kayidza, ade babi a ame kabo ane. Leme enyina ayekī fɔtsa a akena kabo ane. **XXVIII** Tite afɔ fudutsa ale ne foe akū akū. Lanya loto lokɔa lenye toota fomɔ kutse a ane. Nte kubo ane kɔawū babi beblebee. **XXIX** Nte babi a yɔɔle a banena be, kitonekī kɔba funitsā kakpɔta lokɔ wo ɔto.”

Legbā Ne Kutse Libi Kabii Akū.

XXX Yesu via kī, “Litsa bóakɔa bɔkɔnamɔ Baguma legākanyakɔ a? Legbā lewɔdabe makɔa īnye kayɔ ntsa? **XXXI** Fɔla nde kutse libi kabii ne katinya kame flee kī oti bɔe enadu. **XXXII** Kutse kī yapɔ kɔkena futse baū a kame kɔmɔa ne kɔba kame. Kɔane tenane pii ade kɔakpa ona a. Kɔvolabi akena fɔtsɔe ne koe kame.”

XXXIII Yesu bi be Baguma fɔletsa a ne fɔgbã kame ne be kapuli kanu kayɔ onukpẽ.
 XXXIV Yaábi be kadima keba fɔgbã kame. Nte bemɔ ye fɔtsa bakɔlene a odi bidzi a, lɔkɔa yanye foe kayɔ katsa be.

Yesu Fɔ Ɔwe Kɔbẽ Onukpẽ Dɔ.

XXXV Luwi a ke olobe a, Yesu ve ye fɔtsa bakɔlene a eɛ kɪ, “Mifɔ bunyina ɔwɔ lutubu baũ a bɔnaa de abuĩ atide a.” XXXVI Foesũ befɔne bati a biwo ne ɔkɔlo kame. Yesu nawo ekena akũ edzi, ade biyi ɔwɔ a kanyina kayɔ a. Tɔkɔlo bebã lemɛ na ne mui a akũ. XXXVII Owi tábuna ɔwe kpale odi do kavũ awe, ebɔa mui eko ne ɔkɔlo a kame. Ɔkɔlo a ka kɔlaa kɪ kite sukuloo kufe yayi mɔ mui eyela. XXXVIII Lɔkɔ a na kame a, Yesu wa ne ɔkɔlo a liti. Ekɔa sumuye ete lolɔ elamena tida kawa. Ye fɔtsa bakɔlene a nadzela ye ade bibi ye kɪ, “Fɔtsa Ɔtsane, fɔtséla nɔ kɪ bɔwɔ buyua?”

XXXIX Kɪ Yesu yidza edza a, ade ewũni kɪ, “Ɔwe, fɔ kavũ!” Ebi mui a lemɛ kɪ, “Mui, kena dɪĩ.” Ɔwe a fɔ kavũ ade mui a anɛ flee kena dɪĩ a.

XL Yesu via ye fɔtsa bakɔlene a kɪ, “Nde sũ libe wo mi lɔmɔ? Mitátɛ yĩ mido?”

XLI Ne libe a kɪ libuki liwo be a sũ ni, bekavia be akũ kɪ, “Owei koũ nye oti kɪĩ? Mui mɔ ɔwe malo atse ye kale!”

V

Yesu Blɔmena Hũhũ Kpa Etomɛna Onyole Odi Kamɛ.

I Ke liti a, Yesu mɔ ye fɔtsa bakɔlene a naa Galilea lutubu baũ sekɛ kɪ a ne Gerasefɔ tite akũ.

II Kɪ Yesu ne ne ɔkɔlo kame a, onyole odi kɪ hũhũ

kpa deĩ ne ye kame ne eto asie eyatselamo ye. ^{III} Onyole kĩ kadzikõ nye asie a kĩ efuã ne awã. Bati a flee lápuli kapi ye kado ne nkɔsonkɔso kame. ^{IV} Lɔkɔ nye lɔkɔ kĩ basuli ye akpɔ mo abɔa ni, yaveli nkɔsonkɔso a kĩ tipini ye a. Oti kĩ deĩ kɔbẽ kudi odu kĩ odima lápuli kapi ye. ^V Lenye mo suwa flee yamini ne asie mo tɔtɔ kame. Etsẽ yabɔa fɔwɔla lɔkɔa yakɔa boe kakpeli ye akũ.

^{VI} Onyole kĩ dzẽ mo lugo fɔmo emɔ Yesu. Foesũ ewula atse enake aduli ne Yesu nnye. ^{VII} Ade ebɔa fɔwɔla kɔɔba ele kĩ, “Yesu, Baguma Ne Ode Flee Obi! Bɔake nɔ aduli, ne Baguma sũ, tunɔ kĩ oláavele yĩ sɔtɔ!” ^{VIII} Ele foe lomo kitonekĩ enu kĩ Yesu kale kĩ, “Hũhũ kpa, né ne oti kĩ kame!”

^{IX} Yesu via ye kĩ, “Nde bave nɔ?”

Awã naa ele kĩ, “Bave yĩ lidede, kitonekĩ boe a kĩ budeĩ ne onyole kĩ kame a bɔpɔne!” ^X Ade awã ebuki eke Yesu aduli mo osĩ mo osĩ kĩ etablomena be enemena ne tite a na kame a.

^{XI} Lɔkɔ a na kame a, baplakuo pii dzẽ badɛ ne katɔbii kayɔ. ^{XII} Ade bike Yesu aduli kĩ, “Blomena boe bɔnaawo ne baplakuo a kĩ bedzẽ ne akĩ a kame.”

^{XIII} Ekpa be osi ade hũhũ a né ne onyole a kame benawo ne baplakuo kame a. Baplakuo a flee kĩ baawo nde mpim nviã, lo atse kplikplikpli beka kakpenii a, benawo ne ɔwɔ a kame ade be flee bemɔa mui biku a.

^{XIV} Bati a kĩ badāmena be akũ a wula atse benaa ɔmatɔ a mo tikĩ tifuã a kame, benale letsa flee a kĩ leya a. Bati wula atse benaa awã kĩ banaadã letsa a kĩ leya a. ^{XV} Kĩ biwo Yesu sekẽ a, bemó oti a kĩ hũhũ kpa beblebee na ne ye kame

a ne awã. Ekena akũ edzi ade edo atadiε a, ye anε kame lemε kpale. Libe wo bati a flee! ^{XVI} Bikĩ benya loto bemɔ foe a, le letsa a kĩ leya ne onyole a mɔ baplakuo a akũ. ^{XVII} Foesũ bike Yesu aduli kĩ edzakũ ne be tite akũ.

^{XVIII} Kĩ Yesu awo ne ɔkolo kame a, onyole a kĩ hũhũ kpa na ne ye kame a ke ye aduli kĩ, “Fɔ ntomɔ no bɔnaa!”

^{XIX} Lemε Yesu tátunɔ. Mbom ebi ye kĩ, “Naa kola ne no bati sekẽ, lokɔa kabi be letsa a kĩ ɔlate a kena ekpa nɔ, mɔ ayekĩ emɔ no konya a.”

^{XX} Foesũ onyole kĩ naa enamini ne tematɔ ewua kamekame a, ade ebi be foletsa flee a kĩ Yesu kena ekpa ye a. Fokena bikĩ binu foe a saa.

Yesu Tsa Yairo Kĩ Enye Yudafo ɔnokɔẽ Obitsole Mɔ Otsole ɔɔne Odi.

^{XXI} Yesu buki edani enaa lutubu baũ a sekẽ kĩ a. Kĩ ewo de abuĩ a, bati pii yayi ye akũ. ^{XXII} Onyole odi ne Yudafo katsenakɔ banokɔẽ a kame ɔmɔa kĩ bave Yairo ya ne awã. Kĩ emɔ Yesu a, ekena akũ ekpa ye. ^{XXIII} Ade ebi ye mɔ kudulike kĩ, “Yĩ obitsole kabii kĩ ketε futeli ewua-nviã asɔ mɔ ɔsĩ mɔ ɔsĩ. Foesũ ya kayate awe ne ye akũ lokɔa yaana akũ ɔsĩ edzi nkpã.” ^{XXIV} Ade Yesu yidza etomɔ ye a.

Ne ayekĩ bati a kĩ bitomɔ Yesu pɔne sũ, ena ne be kayite kĩ banaa. ^{XXV-XXVI} Otsole odi kĩ babɔane kawula ne ye akũ futeli ewua-nviã flee mɔ lubo kamɔ paa, tito kĩ bawane kadã ye a malo na ne be kame. Ebula sika flee kade ne fɔsɔ kĩ katsa akũ, lemε fɔsɔ a tádo ye, mbom kade fokade ne ode. ^{XXVII} Enu Yesu nkã foesũ ena ne bati a kĩ bitomɔ Yesu ne liti a kame. ^{XXVIII} Ade ebi ye akũ kĩ, “Nte maapuli nta tito ye atadiε malo ni, kufe

maasaε.” **XXIX** Kĩ eta Yesu atadie a, ade akũ fõ ye kawula deedimɔape a. Emó eyi ɔsũ ne ye kame kĩ esae ade ene ne ye lubo kamɔ kame a.

XXX Letaleta Yesu nyi kĩ kobẽ kudi né ne ye kame. Foesũ efõ edza, edani evia bati a kĩ bitomɔ ye a kĩ, “Owei nye ekĩ eta yĩ atadie?”

XXXI Ye fɔtsa bakɔlene a bi ye kĩ, “Dã ayekĩ bati beblebee sinya nɔ. Nde sũ avia kĩ owei leta nɔ?”

XXXII Lemε Yesu dzemena anε kako kadã kĩ yaamɔ oti a kĩ ye leta ye a. **XXXIII** Otsole a mó letsa a kĩ leya ne ye akũ. Foesũ ne libe mɔ kukũtila kame ni, ene eyake aduli ne Yesu anε kame. Ebi ye letsa a kĩ leya a yededeede. **XXXIV** Yesu bi ye kĩ, “Yĩ obitsole, nɔ katekado fõ ɔsae. Naa ne lukudɔ kame. Nɔ lubo kamɔ a lelábuki leya ne nɔ akũ dadaada.”

XXXV Lokɔ a kĩ Yesu kale fukĩ a, batɔ to Yairo awã beyabi ye kĩ, “Nɔ obi a ku kɔkɔε. Nde sũ obuki aha fɔtsa ɔtsane kĩ?”

XXXVI Yesu tátse be kale a, mbom ebi Yairo kĩ, “Tavila, nɔ kɔ te kado.”

XXXVII Yesu kpã Petro, Yakobo mɔ ɔwaε Yohanes be odi benaa Yairo awã. **XXXVIII** Kĩ biwo tɔtɔ a kame a, ade kĩ Yesu mó ayekĩ bati dzẽ mɔ kɔnya mɔ fɔwɔla a, **XXXIX** ewo ne be kame, evia be kĩ, “Litsa tsẽmɔ fɔwɔla kĩ odu? Nde sũ miabe? Kabisẽ kĩ táku. Tida kawa!” **XL** Kĩ ele foe lomɔ pe, bati a kĩ bedzẽ ne awã támɔ ye kameme.

Ade Yesu fõ benye bati a flee benaa kanya, ade efõ kabisẽ a ɔlega mɔ oma mɔ ye fɔtsa bakɔlene elale a biwo ne awã kĩ ɔnɔkpa a waa a. **XLI** Yesu pi ye ne kɔkɔ ade ebi ye kĩ, “Talita koumu!” Foe kayɔ ne tide a kame nye kĩ, “Kayitsõbi kabii, mabi nɔ kĩ yidza!” **XLII** Deedimɔape katsolebi kĩ

iyidza kedza ade kido kato katē awe a. Kī foya lomō a, fōkena be a flee wāwā. ^{XLIII} Lemε Yesu si be mbla mō osī kī betabi odima kadimanō. Ebuki ebi be kī, “Mikpa ke litsedi kenya.”

VI

Nazarefō Sī Yesu.

^I Yesu dzakū ne awā ade bemo ye fōtsa bakolene a benaa omato a kī ye kame bedōla ye a. ^{II} Ne Kaweya Luwi a akū a, enatsa Baguma fōlets a ne katsenakō a. Ye omato bati pii yatse ye fōtsa katsa, ade fōkena be saa a.

Bivia be akū kī, “Ndia oti kīi kolε fōtsa kīi odu etomena? Kadikanyi mō kobē wōdabe bekpa ye sū mō epuli yakena awāwā fōtsa kīi odu? ^{III} Mbōεε nné Maria obi kī yame fōtsa a yanε? Īye nné bawaēnyole nyε Yakobo, Yose, Yuda mō Simon? Miádā! Nné bawaētsole lemε ne awī a?” Foesū bati kīi sī ye katε kado.

^{IV} Yesu bi be kī, “Baguma onukpē onyene te dī ne kako nyε kako, lemε ne ye mōawe omato, mō ye mōawe bati kame ni, elá dī wī lidima.” ^{V-VI} Ne ayekī ye otō bati tâte ye bido sū ni, fōlets a nyene Yesu akū. Fōtsē foe akū sū etápuli ekena awāwā fōtsa pii ne awā, keba kī ete awe ne basone badi akū, ade be foso a do be a.

Yesu Do Fōtsa Bakolene Ewua-nviā a Fōtō.

Ke liti a lemε, Yesu mini ne tukula mō fōkō a kī fufuā awā, ade ekatsa Baguma fōlets a wī a. ^{VII} Eνε ye fōtsa bakolene ewua-nviā a ekpota, ade edo be nviā nviā a. Ekpa be kobē kī konya hūhū kpa flee akū. ^{VIII} Esi be mbla kī, “Odima

εταβοε letsama ελε νε ye osi akũ, mboente otse kĩ bake katsã odi. Mitale funitsã ãye kuvũ nde ayekĩ fotsa bawãne ale a. Mitaboe sika mile νε mi fuvũ kame. ^{IX} Mido mi tepambua, leme mitaboe tilima bebã mibumena letsa a kĩ mido a.”

^X Ebuki ελε kĩ, “Awã kĩ miase a ni, mina νε awã kenaawo loko a kĩ miadzakũ. ^{XI} Awã kĩ bati tãte mi ni, mine νε omato a kame loko mikpa mi aboa kudu miko νε be akũ, fonya nsentseleni fokpa be kĩ Baguma aavele be soto.”

^{XII} Fotsa bakolene ewua-nviã kĩ mini betsa Baguma foletsa wĩ a kĩ odi nye odi edani owole kame. ^{XIII} Beblomena hũhũ kpa pii bitomena bati kame. Betsela basone kugua ade betsa be a.

Legã Herodes Fõ Bitsua Yohanes Mui Owolane a Lolo.

^{XIV} Loko kĩ, Legã Herodes kanu lekenawa wĩ a flee kitonekĩ Yesu dĩ gba νε kako nye kako. Bati badi kale kĩ, “Yohanes, Mui Owolane a, liyidza ebuki eto kanokpa eya! Ade foesũ edeĩ kobẽ yakena awãwã fotsa a!”

^{XV} Badi leme le kĩ, “Baguma Onukpẽ Onyene Eliya yane.”

Babebã leme le kĩ, “Baguma onukpẽ banyene koe a kame odi yane.”

^{XVI} Leme loko a kĩ Legã Herodes nu foletsa kĩ a ye malo ελε kĩ, “Yohanes a kĩ nfõ bitsua ye lolo a, ade ye liyidza ebuki edzi nkpã a.”

^{XVII} Loko lidi kame ni, Legã Herodes moawe lefõ bipi Yohanes ade ke efõ bisuli ye mo towẽ bekoa bido νε kola kĩ bado tokpa bakenane a kame a. Legã Herodes kena fukĩ kitonekĩ Herodia kĩ ekõã a nya owaẽ Filipo otsõ. ^{XVIII} Yohanes

kabi Herodes kī, “Ketáfeta kī ate awaẽ otsõ ɔkɔã.” **XIX** Foesũ Yohanes fɔletsa a wo Herodia kalɔɛ, ade ebɔɛ ye likesĩ a. Ewe kī yako ye lɛmɛ eláapuli ekɛna fukĩ nɛ Lɛgã Herodes liti. **XX** Kitonɛkĩ Lɛgã Herodes avila Yohanes, ade enyina kī Yohanes nyɛ oti wĩ kī ye akũ kpale. Ekana kɔneyi nɛ ye akũ. Yawɛ katse ye fɔtsa katsa a katse fɔko fudi, tito kī ye fɔletsa awɛ ye ɔwɔlɛ kaha nte enu foe.

XXI Ke kawũna a, osi yabinya ekpa Herodia. Luwi a nya Lɛgã Herodes lɛmawi. Lɛgã Herodes vɛ banɔkɔẽ banɔkɔẽ nɛ ye lɛgãkanyakõ, sodzafɔ banɔkɔẽ mɔ banɔkɔẽ nɛ Galilea tite akũ beya nɛ kanyakõ a. **XXII** Herodia obi oyitsõ ya eyato edo Lɛgã Herodes mɔ ye bakoba a kawɔlɛ paa nɛ kanyakõ a.

Foesũ Lɛgã Herodes via oyitsõ a kī, “Litsa awɛ kī nkpa nɔ?” **XXIII** Elo fubo elɛ kī, “Lɛtsa nyɛ lɛtsa kī aavia yĩ ni, maakpa nɔ, nte fɔanya yĩ lɛgãkanyakõ a seke malo!”

XXIV Foesũ oyitsõ kĩ nɛ enavia ɔma kī, “Litsa nvia?”

Ade ɔma bi ye kī, “Via Yohanes, mui ɔwɔlanɛ a, lolɔ.”

XXV Oyitsõ a wɛ sɔwa enaa kɔla a kame, ade ebi Lɛgã Herodes kī, “Mawɛ kī tsua Yohanes Mui ɔwɔlanɛ a lolɔ kate nɛ tsensi akũ kakpa yĩ finyaa finyaakĩ.”

XXVI Fukĩ wo Lɛgã Herodes kalɔɛ paa lɛmɛ eláapuli edani ye semɛ nɛ fubo a kī elo nɛ banɔkɔẽ banɔkɔẽ anɛ sũ. **XXVII** Foesũ awã naa edo ye ɔblafɔ kī enaatsua Yohanes lolɔ eyamena. ɔblafɔ a natsua naa kɔla kī bado bati a enatsua

Yohanes loló. **XXVIII** Ekóá loló a ete ne tsensi akũ ade ekóá ema oyitsõ a. Ye malo ete ekóá de ema oma.

XXIX Kĩ Yohanes fotsa bakolene a nu foletsa a, benaa benaboe ye onokpa a benabila.

Yesu Kpa Bati Mpim Elo Funitsã.

XXX Foto banyane a kĩ Yesu do kĩ mini ne foko a kĩ fufuã buki bimuniki, ade bibi ye fotsa flee a kĩ bekena, fotsa a kĩ betsa mo fotsa a kĩ foya ne be osi akũ a. **XXXI** Awã kĩ Yesu mo be bena a bati a yapo lidede, bikĩ anaa ni bikĩ aya, foesũ betána osi mo banya malo. Ade Yesu bi be kĩ, “Mifõ boe odi bonaa awã kĩ kadã dũ bonaa weya sukuloo.”

XXXII Biwo ne okolo kame kĩ banaa awã kĩ bati leláa. **XXXIII** Lemẽ kĩ banaa a, bati pii mo be biyi osũ, ade ke biwula atse benya be loto biwo awã fomó Yesu mo ye fotsa bakolene a nawo awã. **XXXIV** Kĩ Yesu né ne okolo a kame a, emo bati beblebee. Be akũ ko ye konya kitonekĩ bekena nde baveli kĩ belá okpãne. Foesũ eyi kayo mo be Baguma foletsa katsa.

XXXV Kĩ olobe wo oto a, ye fotsa bakolene a ya beyabi ye kĩ, “Kade do kiyua. Ayekĩ awĩ la a beláana letsama benya. **XXXVI** Foesũ kpa be osi bedzakũ, lokoa nte biwo temato a mo tukula kame a, baana litsedi beya benya.”

XXXVII Yesu bi be kĩ, “Mi moawe a miwe litsedi mikpa be benya.”

Bekpa mbuaye kĩ, “Be kanya aate nde oti moa tideto elẽ kotokase. Awe kĩ bubula sika kade ne be kanya odi sũ?”

XXXVIII Ade ke Yesu via be kĩ, “Abodoo eni minee? Minaa minaada.”

Kĩ benadã a bibi ye kĩ, “Abodoo elo mo kofabi nviã pe deĩ.”

XXXIX Yesu bi ye fotsa bakolene a kĩ befõ bati a flee bidzi ne kutsu kutsu kame ne tuwĩ bloblo akũ. XL Bati a flee sê bidzi ne kutsu kutsu kame. Kutsu kudi aawo nde bati oha, kudi leme aawo nde aduenum.

XLI Yesu boe abodoo elo mo kofabi nviã a ade kĩ edã odetó kame fee a, enye Baguma kole ade eyele abodoo a. Ekoa foe ekpa ye fotsa bakolene a kĩ besê bekpa kutsu a flee. Ade ekena kofabi a leme lomo a. XLII Bati a flee nya biwĩ.

XLIII Kĩ ye fotsa bakolene a fila funitsã a kĩ fute bekpota a, fuyi koba tetsetse ewua-nviã. XLIV Ade bati a kĩ benya funitsã a banyole nene odi lidede wo mpim elo.

Yesu Tsã Ne Mui Anɛ.

XLV Awã naa Yesu fõ ye fotsa bakolene a wo ne okolo kame kĩ benaa omato kĩ bave Betsaida ne lutubu baũ sekẽ kĩ a. Efõ bati beblebee a leme pansam.

XLVI Ke liti a, ye malo ede enaa oto kalete enaboa mpaɛ. XLVII Ke lenye a, okolo a wo owo lutubu baũ a kayite, ade kite Yesu odi ne awã a. XLVIII Emó kĩ kekapiã ye bati a mo okolo a kahali, kitonekĩ owe kavũ katselamo be. Foesũ fomó onone todõũ elo aaboa a, Yesu tsã mui anɛ enaa be sekẽ. Kĩ efuã be a, ekena nde yatẽ be, XLIX ade bebõa fowola kĩ, “Onokpa yanɛ!” L Libe wo be flee.

Leme letaleta Yesu lomo be kodzela kĩ, “Mitavila! Yĩ manɛ. Mina owole!” LI Ewo ne be sekẽ ne okolo a kame, ade owe a fõ kavũ a. Fukĩ fõ ye fotsa bakolene a kena saa, LII kitonekĩ

betányi ayekĩ fòkèna fòmò ekpa bati mpim elo funitsã bɛnya bitina. Be kakona nɛ fukĩ akũ malo tákpale, foesũ betátɛ bido.

Yesu Tsa Basone Nɛ Genezaret Tite Akũ.

^{LIII} Kĩ biwo ɔwɔ lutubu baũ a sɛkɛ sitide a, biduma nɛ Genezaret. Ade awã bɛbla be ɔkolo bɛdzɛla a. ^{LIV} Mò be kanɛ nɛ ɔkolo a kame pɛ bati mò Yesu biyi ɔsũ. ^{LV} Foesũ biwula atɛ benakpa kanyi nɛ be tite flee akũ. Awã kĩ binu kĩ Yesu na a, bɛlo basone bɛma ye. ^{LVI} Ade kako nyɛ kako kĩ Yesu tsã, nte ɔmatò kame o-o, ìye akula kame o-o, bati kayamena basone nɛ kɔyaatò ade bɛkawã ye kĩ efɔ̃ beta ye atadie atò. Bikĩ beta ye a na akũ ɔsĩ.

VII

Yesu Lɛ Kĩ Bɛnɛ Batidziwa Amanie Batsa Fɔtsa.

^I Farisifo mò Yudafo mbla batsanɛ badi to Yerusalem bɛyatsɛna nɛ Yesu sɛkɛ. ^{II} Bɛmó kĩ ye fɔtsa bakolɛnɛ a dzi banya, ade badi távɔlɛ awɛ ndɛ ayekĩ be Farisifo bɛtsa bati kĩ bɛkaakɛna a. ^{III} Biyi foe ɔsũ kitonekĩ Farisifo a mò Yudafo a flee tomò be bawanyò amanie a kĩ bɛkɔa biyi be a. Foesũ nte betávɔlɛ awɛ kavɔlɛ wĩ ni, baányã. ^{IV} Nte bɛya litsedi bitomɛna kɔyaatò malo, kɛnɛ kĩ bavɔlɛ awɛ fòmò banya. Bitomɛna mbla kumekumɛ lɛmɛ kĩ bibo anɛ bɛyamò a, ndɛ kuyei, fɔtɔtsa mò fugumi kavɔlɛ.

^V Foesũ Farisifo mò Yudafo mbla batsanɛ a via Yesu kĩ, “Nde sũ bikĩ bitomɛna nò a lákɛna nɛ boe bawanyò amanie akũ? Ade nte banya malo baávɔlɛ awɛ!”

^{VI} Yesu kpa mbuaye kī, “Mi ane kame keke fotsa bakenane! Foletsa a kī Baguma Onukpē Ōnyene Yesaya le ne mi akū a ya ne foe kame perepere. Baguma le kī,

‘Bati kīi asum yī mo onukpē kame foletsa menemenene odi,
leme be towole deī lugo ne yī sekē.

^{VII} Pupilidza basum yī,
kitonekī batsa batidziwa mbla ne Baguma mbla a kadokō.’

^{VIII} Fōatsa kī bekōa yī mbla biyi ne owē ade bekōa batidziwa amanie a batsa a!”

^{IX} Yesu bi be kī, “Mideī tedake tidi kī mitomena ade mikōa Baguma mbla miyi ne owē ne ayekī miakena ne mi bawanyo amanie akū sū. ^X Foesū Baguma Onukpē Ōnyene Mose tsele eyi kī, ‘Bu aga mo ama.’ Ade ebuki ele kī, ‘Odi nye odi kī edumu olega iye oma ni, kene kī beko ye.’

^{XI} Leme miatsa kī nte odi deī litsedi kī yaakōa ebumo ye bamanē ni, yaapuli ele kī ekōa foe eyi lite nde fotsa kpalewa ekpa Baguma lokōa fōatsa kī owula kōa fōatsa tewa a eyi kī yaabōa afolie ekpa Baguma. ^{XII} Ade ke mitākpa ye osi malo kī yabumena ye bamanē a mo fotsa tewa a! ^{XIII} Ade aye mikōa mi bawanyo amanie mibula Baguma mbla kade a. Miakena fotsa bebā nde fukīi odu.”

Fōtsa Kī Fōato Oti Owole Kame Ni, Ade Foe Ado Ye Efīi a.

^{XIV} Ke liti a, Yesu buki eve bati a flee ekpota ne ye sekē. Ebi be kī, ^{XV} “Letsa nye letsa kī oti nya mo fuwo ne ye kame ni, fōádo ye efīi ne Baguma ane. Mbom letsa kī lato oti owole kame a, ade

foe ado ye efĩ a. ^{XVI} Mi flee miyi ato mitse katse wĩ.”

^{XVII} Kĩ edzakũ ne be sekẽ enaa kola a, ye fotsa bakolene a via ye kĩ enye legbã a kayo etsa be.

^{XVIII} Yesu bi be kĩ, “Nte mitánu kale kĩ kayo kekõ mi adzuni lelápuli epi letsama. Fowaa yedede kĩ letsa kĩ lawo ne oti kame ni, foádo ye efĩ. ^{XIX} Kitonekĩ fotáwo ne ye owole kame. Mbom fonaa ye seme kame, ade fotsa ye kame fone nde fotsa kpa a.” Letsa a kĩ Yesu le ne awĩ tsa kĩ funitsã fudi nye fudi nene fokpa kanya.

^{XX} Ebuki ele enamena loto kĩ, “Letsa a kĩ lanɛ kato oti owole kame ni, ade foe ado ye efĩ a.

^{XXI} Kitonekĩ oti owole kame tokpa kakona ato, tokpa a tidi nye linyolewe mo litsolewe, kaye, oti kaka, konyo mo kotsõ liti kanɛ, ^{XXII} anɛ ngbã, ablo kakena, fovã kama, sukena fowetsa kĩ fonene, likesĩ, fovã kama kate ne bati akũ, lukũta mo kadzi ne tidzimbi kame. ^{XXIII} Fotsa kĩ flee to oti kame ade foe ado ye efĩ a.”

Otsole Odi Kĩ Enyé Yudani Te Yesu Edo.

^{XXIV} Yesu dzakũ enaa tite a kĩ tifuã omato kĩ bave Tiro a kame. Ewo ne toto tidi kame. Etawe kĩ odima enyi kĩ edeĩ ne awã, leme etápuli ekola ye akũ. ^{XXV} Otsole odi kĩ hũhũ kpa deĩ ne ye obi kame nu kĩ Yesu na ne awã, ade eya eyake aduli ne ye anɛ kame a. ^{XXVI} Otsole kĩ nye ononoẽ kĩ bemo Yudafɔ baákã. Enye Foenikeni kĩ eto Siria tite akũ. Eke Yesu aduli kĩ eblomena hũhũ kpa a etomena obitsole kame.

^{XXVII} Leme Yesu bi ye kĩ, “Fõ bekpa babisẽ funitsã tõ. Fonéne kĩ bakoa babisẽ funitsã bekpa bakpete.”

XXVIII Awã naa otsole a kpa mbuaye kī, “Awoo, boe ɔlega, lɛmɛ bakpete a kī bikoni nɛ kanyakɔ̃ a ana osi kanya babisẽ funitsã a kī fuwuli fuko nɛ tite a.”

XXIX Yesu bi ye kī, “Nɛ letsa a kī ɔlɛ nɛ awĩ sũ ni, kaanaa kɔla. Aamɔ kī hũhũ kpa a né nɛ nɔ obitsole a kamɛ.”

XXX Otsole kī naa kɔla, ade ɛmɔ kī obi a waa nɛ ɔkɛna akũ, lokɔa hũhũ kpa a nɛ nɛ ye kamɛ.

Yesu Tsa Oti Kī Enye ɔtɔsĩne Mɔ Omumu.

XXXI Kī Yesu dzakũ nɛ Tiro kayite a ade etsã Sidon ɔmatɔ a kamɛ a, etsã Galilea ɔwɔ lutubu baũ abuĩ, ɛnaa tɛmatɔ ewua a kamɛkamɛ a. XXXII Nɛ awã a, bati badi yamena odi kī esĩ atɔ ade ɛnye omumu lɛmɛ a. Bike ye aduli kī ete awɛ nɛ ye akũ.

XXXIII Foesũ Yesu kpã ye ɛnamena ɔɔwẽ, ade ɛkɔa bawobi edo nɛ ye atɔ kamɛ a, ade etua tanɛ lɛmɛ ete nɛ lawobi akũ ɛkɔa ekputa onyole a sɛmɛ a. XXXIV Ade Yesu dzɛla anɛ ɛdã ode, ɛwɛya eke fɛɛ ade ebi onyole a kī, “Hefata,” foe kayɔ nyɛ kī, “Binya!” XXXV Deedimɔapɛ onyole a atɔ binya ade ye sɛmɛ tɔwẽ wũnya, epuli ɛlɛ kɔdzɛla a.

XXXVI Yesu sua bati a kī bɛdzẽ nɛ awã osi kī bɛtabi odima letsama nɛ letsa a kī bɛmó a akũ. Lɛmɛ pupulidza esi be mbla, kitonɛkī be flee bɛnaa bɛnale letsa kī lɛya a. XXXVII Bati a flee kī binu foletsã kī a, fɔkɛna be saa! Ade bibi akũ kī, “Yakɛna letsã nyɛ letsã kakɛna wĩ. ɛfɔ̃ omumu alɛ kɔdzɛla, ade ɔtɔsĩne lɛmɛ anu fɔkɔ a!”

VIII

Yesu Kpa Bati Mpim Ena Funitsã.

^I Owi tábuna fomo bati pii yatsena ne awã. Kĩ letsama leláa kī baanya sũ ni, Yesu ve ye fotsa bakolene a efuãmo ye ade ebi be kī, ^{II} “Bati kīi foletsa ako yī konya kitonekī bena ne yī sekē fuwi elale flee. Ade finyaakīi belá letsama kī baanya. ^{III} Nte nfone be awe mo bedzakū mo kole ni, baanaa loka ane aasinya be ne osi, kitonekī badi to mo lugo.”

^{IV} Ye fotsa bakolene a via ye kī, “Ne kosa kīi kame, ndia oti odi aana funitsã ekpa bati kī benya biwī?”

^V Awã na Yesu via be kī, “Abodoo eni mineε?”
Bibi ye kī, “Boneε abodoo evũkono.”

^{VI} Yesu bi bati a kī bekena akū bidzi. Ade eboε abodoo evũkono a. Enye Baguma kole ade eyele ye fokofoke a, ekpa ekpa ye fotsa bakolene a kī bekpa bekpa bati a flee. Be malo bete, ade besē bekpa be a. ^{VII} Benεε kofabi kubii kudi leme ne awã, ade Yesu boε koe leme enye kole a. Ekpa koe ekpa ye fotsa bakolene a kī besē koe leme bekpa be. ^{VIII-IX} Bati a flee nya biwī. Bati a lidede aawo mpim ena. Kī benya biyua a, ye fotsa bakolene a fila fuwuliwa a kī fute a bekpota ade fuyi koba tetsetε kpale kpale evũkono a. Ke liti a, Yesu nye bati a flee osi ade bedzakū a. ^X Yesu mo ye fotsa bakolene a wo ne okolo kame binyina benaa Dalmanuta tite akū.

Farisifo Via Kī Yesu Ekena Awãwã Fotsa Etsa Be.

XI Farisifo badi ya ne Yesu sekẽ ade bekavia ye foletsa kĩ baso ye bedã. Foesũ bibi ye kĩ ekena awãwã fotsa fudi lokoa bemo kĩ eto Baguma sekẽ. XII Lemε Yesu weya eke ade evia be kĩ, “Nde sũ koũ nviã babi awε kĩ bamo awãwã fotsa? Oowo, mabi mi kĩ nláayakena awãwã fotsa a odu kĩ miawε ne awĩ!” XIII Edzakũ ne be sekẽ ade ebuki ewo ne okolo a kame enyina enaa owo lutubu baũ a sekẽ sitide a.

Yesu Tsa Kĩ Bati Támo Ye Biyi Jsũ.

XIV Kĩ banaa a, ye fotsa bakolene a lela abodoo kaboe kabu, foesũ abodoo a amape bena ne okolo a kame. XV Yesu bi be kĩ, “Midã kadã wĩ ne Legã Herodes mo Farisifo oyila a akũ.”

XVI Bekavia akũ kĩ, “Ade ayekĩ bonée abodoo adima sũ mo ele fukĩ a.”

XVII Lemε Yesu nyi letsa a kĩ bekale a, ade evia be kĩ, “Nde sũ miale abodoo kataboe foletsa? Foesũ keyawo loko kũ a mitáyi osũ iye mitánu foe kayo tã? Mi ato deĩ osĩ paa! Miáte letsama anε? XVIII Mideĩ anε lemε miámọ! Mideĩ ato lemε miánu! XIX Mitámọ loko a kĩ nsẽ abodoo elo nkpa bati mpim elo beba a? Tetsitse eni fokεfokε kubii a kĩ fute a yi?”

Bibi ye kĩ, “Koba tetsitse ewua-nviã.”

XX Yesu buki evia be kĩ, “Mo loko a kĩ nsẽ abodoo evũkono nkpa bati mpim ena a, awuliwa a kĩ ete a, tetsitse eni eyi?”

Bibi ye kĩ, “Te kpale kpale evũkono.”

XXI Ade evia be kĩ, “Keyawo nviã kũ a, nde sũ mo miányi oti a odu kĩ ye mane?”

Yesu Binya Onekune Anε.

XXII Kĩ Yesu mo ye fotsa bakolene a wo Betsaida a, bati badi kpã onekune bema ye ade bike ye aduli kĩ ekwa awe eta onekune a. XXIII Yesu pi oti a ne kokpo ade ekpã ye enamena omato a obaẽ a. Kĩ evũma tane eko ne oti a ane kame a, ekwa awe ete ne ye akũ ade evia ye kĩ, “Amo litsedi?”

XXIV Ade oti a dzela ane edã ode ele kĩ, “Oo! Mamõ bati, leme badã nde futse. Leme betsẽ bamini.”

XXV Ade Yesu buki eta ye ane a. Leyade kĩ kõ oti a binya ye ane yededeede, ye ane kame kpale ade emõ letsa nye letsa kamõ wĩ a. XXVI Yesu nye ye osi ebi ye kĩ etabuki etsã omato a kame enaa kola.

Petro Tsa Kĩ Yesu Nye Oti a Kĩ Bɛbɔa Tɔdɔ a.

XXVII Ke liti a, Yesu mo ye fotsa bakolene a dzakũ ne awã benaa tukula kĩ tifuã Kaisarea ne Filipi kamekame a. Kĩ banaa ne osi a, Yesu via be kĩ, “Mibi yĩ oti a odu kĩ bati ale kĩ ye mane.”

XXVIII Bibi ye kĩ, “Badi ale kĩ no nye Yohanes Mui Owolane a. Ade badi leme ale kĩ no nye Baguma Onukpẽ Jnyene Eliya. Badi bebã leme ale kĩ no nye Baguma onukpẽ banyene koe a kame omõa.”

XXIX Ade ke Yesu buki evia be kĩ, “Nde nye mi leme? Owei miale kĩ ye mane?”

Petro bi ye kĩ, “No nye Kristo a Kĩ Bɛbɔa Tɔdɔ a.”

XXX Yesu sua be osi kĩ betabi odima letsa a kĩ binyi ne ye akũ ne awĩ a.

Yesu Le Kodzela Etomena Ye Wuda Mo Kayidza Akũ.

XXXI Ade Yesu yi kayo mo ye fotsa bakolene a fotsa fudi katsa a. Ebi be ki, "Kene ki foya ki Otidziwa Obi a emo lubo etomena omato banokoẽ, Yudafɔ basofo banokoẽ, mo Yudafɔ mbla batsane a awe kame. Ade baasi ye, beko ye, leme ne luwi lelalede aku ni, yaayidza edzi nkpã." **XXXII** Ebi be fukii yededeede binu. Petro kpã ye enamena owẽ, ade etsa ki bemo ye betakena omoa ne letsa a ki ele a aku.

XXXIII Leme ki Yesu dani edã ye fotsa bakolene a, ekã Petro ane ele ki, "Dzakũ ne yi aku Satana! Aawe fotsa a ki Baguma awe a, mbom awe letsa a ki batidziwa awe a odi!"

XXXIV Foesũ Yesu ve bati kodabu a mo ye fotsa bakolene a beya ne ye sekẽ ade ebi be ki, "Nte odi awe ki yatomo yi ni, kene ki yafone ye apediẽ awe, eboe ye lubo kamɔ folotsa luwi nye luwi lokoa etomo yi ne liti. **XXXV** Kitoneki oti ki ewe ki yapili ye nkpã ni, yaayela ye. Leme oti ki ekoa ye aku ekpa ne yi mo Kale Wi a sũ ni, yaana nkpã daa. **XXXVI** Litsa nfaso oti aana nte ena katinya kame fotsa flee mo eyela ye nkpã moawe a? **XXXVII** Iye litsa oti aakoa evemena mo nkpã moawe a? **XXXVIII** Foesũ nte yi mo yi fotsa katsa a flee nye fonyoãtsa fokpa odi ne ablo katinya kpa kii kame ni, ye malo yaanya fonyoãtsa ekpa Yi Otidziwa Obi, ne loko a ki bomó Baguma foto banyane kpalewa a bóaya ne Baguma kukũkpale a flee kame."

IX

¹ Yesu buki ebi be ki, "Mabi mi ne onokoali kame ki, badi deĩ ne mi kame ne awi ki beláaku

kenaawo kī bemó Baguma legākanya a ya mo kóbě.”

Baguma Nye Yesu Kukūkpale Etsa.

II Fuwi evū liti a, Yesu kpā Petro, mo Yakobo, mo Yohanes benaa ɔto akū, awā kī be bena. Kī fotsa bakolenε a kadā a, Yesu akū dani ne be anε kame, III ade ye tetadie dani tivoε keba ayekī otidziwa aapuli εvoλε te tené lomɔ. IV Adeke fotsa bakolenε elale a mó Baguma onukpě banyene Mose mo Eliya kī benye be akū bekale kodzela mo Yesu a.

V Ade Petro bi Yesu kī, “Fotsa ɔtsanε, fɔnεne kī boya ne awī! Fō bokena tɛpatampa elale, no ade amɔa, Mose ade amɔa, lokɔa Eliya lemε ade amɔa.” VI Lemε enyina letsa a kī ekale a, kitonekī beténe kavila.

VII Lufulututu lidi ka leyasua be akū, ade odo né eto de kame kī, “Ade yī obi kī maátuno ye kale a, mitse ye kale!”

VIII Letaleta bedā foko bisinya lemε betámɔ odima keba Yesu kī εdze ne be ɔwě.

IX Kī bito ɔto akū baka a, Yesu si be mbla kī, “Mitabi odima letsa a kī mimó a kenaawo lokɔ kī Otidziwa Obi a yidza eto banokpa kame.” X Befō kale kī kahɔ ne be lolɔ kame, lemε nte be odi bidzi a bale kodzela ne foe akū kavia akū kī, “Kayidza kato kanokpa a kayɔ nye litsa?”

XI Adeke bivia Yesu kī, “Litsa sū Yudafɔ mbla batsanε a ale kī, kenε kī Baguma Onukpě ɔnyene Eliya enya lotɔ eya?”

XII Yesu bi be kī, “Nuwī, kenε kī Eliya enya lotɔ eya ayekī yaamanε letsa nye letsa eyi. Litsa sū betsele ne Katsεle Kpalewa a kame kī Otidziwa

Obi a aayamɔ lubo pii, bisupa ye lɛmɛ a? ^{XIII} Mabi mi kī Eliya ya kɔkɔɛ ade bɛkɛna ye letsa a kī bɛwɛ a, ndɛ ayekī bɛtsɛlɛ biyi nɛ ye akū a.”

Yesu Tsa Kanyolebi Kadi Kī Hūhū Kpa Deī Nɛ Ke Kamɛ.

^{XIV} Kī Yesu mɔ ye fɔtsa bakɔlɛnɛ ɛlɛlɛ a muniki bɛya nɛ be nkaɛ a sɛkɛ a, bɛmó bati kɔdabu baū kī bisinya be, ade mbla batsanɛ a badi kavɛlɛ fɔlɛtsa mɔ be a. ^{XV} Kī bati a kɔdabu a mó Yesu a, akū dzuli be, ade biwula atɛ bɛnawɔna ye a.

^{XVI} Yesu via ye fɔtsa bakɔlɛnɛ a kī, “Litsa fɔlɛtsa milamɔ kavɛlɛ mɔ be?”

^{XVII} Onyole odi nɛ bati kɔdabu a kamɛ kpa mbuayɛ kī, “Fɔtsa ɔtsanɛ, nkpā yī obi mma nɔ, kitonɛkī hūhū kpa deī nɛ ye kamɛ ade yaapuli ɛlɛ kɔdzɛla a. ^{XVIII} Kakɔ nyɛ kakɔ kī hūhū a api ye ni, yabɔɛ ye kamuni nɛ tite, ade kuvū anɛ nɛ ye onukpɛ, yaba adɔ lɔkɔa ye akū flee asinsī. Nkpā ye mma nɔ fɔtsa bakɔlɛnɛ a kī bɛblɔmɛna hūhū a, lɛmɛ bɛtápuli.”

^{XIX} Yesu bi be kī, “O! Nviā babi kī milá katɛkado! Maana nɛ mi sɛkɛ daa? Lɔkɔ lɔɔdabe mado ɔwɔlɛ nɛlɛ mi nnaawo? Mikpā kanyolebi a mima yī!”

^{XX} Bɛkpā ke bɛma Yesu. Kī hūhū a sila ɛmɔ Yesu a, efufulinya kanyolebi a kɛka kɛto, kɛkamilinya nɛ tite kanɛ kuvū nɛ onukpɛ.

^{XXI} Ade Yesu via ɔlɛga kī, “Lɔkɔ ɔdabe fuyi ye kayɔ?”

ɛkpa mbuayɛ kī, “Kito anɛ ye tibisɛ kamɛ. ^{XXII} Lɔkɔ pii hūhū kpa a awɛ kī yako ye, foesū yabɔɛ ye kamuni nɛ fi iye mui kamɛ. Ntɛ aapuli

okena litsedi ni, mó boe konya lokoa kabumo boe.”

XXIII Yesu bi ye kī, “Kale ole kī nte maapuli? Letsa nye letsa aapuli leya lekpa oti kī ete yī edo.”

XXIV Deedimopape kabisēē a olega boa fowola kī, “Ndeī katekado, leme keronē, bumō yī nna katekado mbu!”

XXV Kī Yesu mó kī bati kodabu a kadu kafuā be a, ewūni ne hūhū kpa a akū kī, “Nō hūhū kpa otosīne mō omumu, mabi nō kī ne ne kabisēē a kame, tabuki oyaawo ne ke kame dadaada!”

XXVI Hūhū kpa a boa fowola kooba, efufulinya kabisēē a mō osī, eboe ke emuni ne tite, ade ené ne ke kame a. Kabisēē a kena nde kaku kiku, foēsū bati a pii le kī, “Eku!” XXVII Leme Yesu pi kabisēē a ne kōkpō ade kiyidza kedza a.

XXVIII Ke liti a, kī Yesu naa toto kame a, ye fotsa bakolene a via ye petee kī, “Nde sū boe kō botāpuli boblomēna hūhū kpa a ené ne ye kame?”

XXIX Ade Yesu bi be kī, “Belāapuli beblomēna hūhū kī odu, mbōente betāmēna foe mpaēbo kame.”

Yesu Buki Ele Kodzela Ne Ye Wuda Akū.

XXX Yesu mō ye fotsa bakolene a dzakū ne awā benatsā Galilea. Yesu táwe kī odima anyi awā kī enaa, XXXI kitonekī ekatsa ye fotsa bakolene a fotsa. Ebi be kī, “Baakoa Otidziwa Obi a bido ne bati awe ade baako ye a, leme ne luwi lelalede liti a, yaayidza edzi nkpā.” XXXII Leme betānu letsa kī ebi be a kayo, ade bivila kī bavia ye a.

Owei Nye Oti a Kī Ebē Flee a?

XXXIII Beyawo Kapernaum omato a kame, ade kī biwo ne tōto kame a, Yesu via ye fōtsa bakolene a kī, “Litsa kale mivele ne osi a?” XXXIV Leme betákpa ye mbuaye, kitonekī ne osi akū a, bekavele fōlets a ne owula kī ebē flee ne be kame.

XXXV Yesu kena akū edzi eve fōtsa bakolene ewua-nviā a, ebi be kī, “Odi nye odi kī yawe loto enya ni, kene kī enya bati a flee nkae mo osumune.”

XXXVI Ke liti a, ekpā kabisēē kadi keyadza ne be ane kame, ade kī etu eboomu ke a, ebi be kī, XXXVII “Odi nye odi kī yaate kabisēē kī kame omoa ne yī dī akū ni, yī ete. Odi nye odi kī ete yī ni, nné yi odi ete, mbom ete oti a kī edo yī a leme.”

Odi Nye Odi Kī Etáyidza Edza Ne Boe Akū Ni, Etomo Boe.

XXXVIII Ade Yohanes bi Yesu kī, “Fōtsa Ōtsane, bómó onyole odi kī ekablomena hūhū kpa ne no dī akū, ade bubi ye kī efō, kitonekī elāa boe kame.”

XXXIX Yesu bi be kī, “Mitasua ye osi, kitonekī oti kī yakena awāwā fōtsa ne yī dī akū ni, elāadani ele kale kpa ne yī akū. XL Odi nye odi kī yaákena letsama katia boe ni, edzē ne boe liti.

XLI “Ōnokoali a mabi mi kī odi nye odi kī yaakpa mi mui mimoa kī minye yī bade sū ni, yaana ye kotokase kokooko.”

Bati Kakpā Kado Ne Tōkpa Kame.

XLII “Nte oti odi aafō kabisēē kī kame omoa kī ete yī edo leyela ye katekado ni, fonene fobē fokpa oti a nte bekoa kowole bevela ne ye somo, beta ye bido ne mpo kame.

XLIII-XLIV “Foesũ nte nɔ awɛ afɔ akɛna tɔkpa ni, tsua ye kamuni. Fɔnɛnɛ fɔbɛ fɔkpa nɔ kɔ aakɔa awɛ mɔa owo nɛ nkpã kɔ elã kawũna kame, keba kɔ odeĩ awɛ nviã lɔkɔa beɔkɔa nɔ bido nɛ fi luwotu kɔ laãdĩ a kame. XLV-XLVI Ade nte nɔ kɔbɔa akpã nɔ kado nɛ tɔkpa kame ni, tsua koe kamuni. Fɔnɛnɛ fɔbɛ kɔ odeĩ kɔbɔa mɔa ɔna nkpã mɔawɛ a, keba kɔ odeĩ abɔa nviã ade baata nɔ bido nɛ fi kame a. XLVII Nte nɔ linebi akpã nɔ kado nɛ tɔkpa kame ni, bɔle de kanyɛ. Fɔnɛnɛ fɔkpa nɔ kɔ aakɔa linebi mɔa owo nɛ Baguma legãkanyakɔ a, keba kɔ odeĩ banɛbi nviã lemɛ baata nɔ bido nɛ fi luwotu kame.

XLVIII ‘Awã kɔ batebi a kɔ bawo be a lãku dadaada, ade fi a kɔ fɔapila be a lemɛ lãdĩ da a.’

XLIX Kitonɛkɔ baakɔa fi bekpale odi nye odi akũ ndɛ ayekɔ bakɔa ledɛmɛ kakpale afolie akũ a.

L “Ledɛmɛ nɛnɛ, lemɛ nte de ɔmɛnɛ nɛ de kame ni, ndɛ aakɛna obuki ɔkɔa ɔmɛnɛ odo nɛ de kame? Foesũ mina tɔkɔba kakɛna ledɛmɛ nɛ mi kame, lɔkɔa midzi nɛ lukudo kame mɔ akũ akũ.”

X

Yesu Tsa Fɔtsa Nɛ Kɔtsɔ Mɔ Kɔnyɔ Kasĩ Akũ.

I Yesu dzakũ nɛ awã ɛnaa Yudea amantam kame mɔ Yordan ɔwo liti. Bati kɔdabu buki beyatsɛna nɛ ye akũ nɛ awã, ade etsa be fɔtsa ndɛ ayekɔ yawɛ kakɛna a.

II Farisifo badi ya nɛ ye sekɛ bewɛ kɔ basɔ ye bedã, foesũ bivia Yesu kɔ, “Boe mbla a kpa osi kɔ onyole esĩ ɔtsɔ?”

III Yesu kɔa kavia ekpa mbuaye kɔ, “Mbla adabe Mose kpa mi?”

^{IV} Bɛkpa mbuayɛ kī, “Mose kpa osi kī onyole ɛtsɛlɛ kasī ovoli ɛkpa ye kanyi lɔkɔa esī ye.”

^V Yesu bi be kī, “Mose tsɛlɛ mbla kīī nɛ mi atɔ ɔsī sū. ^{VI} Kito katinya kayɔkayi a, onyole mɔ otsole Baguma kɛna. ^{VII} Nɛ fukīī sū onyole aafɔnɛ ɔlɛga mɔ ɔma awɛ ɛkɛna ɔmɔa mɔ ɔtsɔ, ^{VIII} lɔkɔa be nviā a baakɛna oti ɔmɔa. Foesū bibuki benyé bati nviā, mbom bɛkɛna oti mɔa. ^{IX} Foesū letsa a kī Baguma boomu ni, otidziwa ɛtasɛ foe kame!”

^X Ke liti a, kī bɛya nɛ toto kame a, ye fɔtsa bakɔlɛnɛ a via ye fɔletsa nɛ fukī ɛlɛ a akū. ^{XI} Yesu bi be kī, “Onyole kī esī ɔtsɔ mɔ ebuki ɛkɔā ɔbɛbā ni, ɛbɔa adɔpaa nɛ ɔtsɔ akū. ^{XII} Ade ayea ntɛ otsole fɔnɛ ɔnyɔ awɛ mɔ ɛnadzi mɔ onyole bɛbā ni, ye malo ɛbɔa adɔpaa.”

Yesu Hila Babisɛ Kubii.

^{XIII} Nɛ lɔkɔ a na kame a, bati badi kpā babisɛ bɛma Yesu kī ete awɛ nɛ be akū, lɛmɛ ye fɔtsa bakɔlɛnɛ a kā be anɛ. ^{XIV} Kī Yesu mɔ fukīī a ni, ɛna kalɔkpa ade ebi ye fɔtsa bakɔlɛnɛ a kī, “Mifɔ babisɛ bɛya nɛ yī sɛkɛ, mitasua be osi, kitonɛkī ade bati kīī odu lá Baguma lɛgākanyakɔ a. ^{XV} Ɔnɔkɔali a mabi mi kī odi nyɛ odi kī ɛtáɛ Baguma lɛgākanyakɔ a ndɛ obisɛ aye ni, ɛláawo nɛ Baguma lɛgākanyakɔ a kame da.” ^{XVI} Ke liti a, etu eboomu babisɛ a, ade ete awɛ nɛ be akū ehila be a.

Osikani Odi Via Yesu Osi a Kī Ye Akū Yaatsā Ɛna Nkpā Wī a.

^{XVII} Kī Yesu yidza epi osi a, onyole odi wula atɛ ɛyake aduli nɛ ye anɛ kame evia ye kī, “Fɔtsa

Ɔtsanɛ Wī, litsa kɛnɛ kī nkɛna fɔmɔ maana nkpā kī elá kawūna a?”

XXVIII Yesu via ye kī, “Nde sū ave yī oti wī? Odima lenyé oti wī mbɔɛntɛ Baguma odi.

XIX Onyina Baguma mbla a. Takɔ oti, tanɛ kɔnyɔ ãye kɔtsɔ̃ liti, taye, tama fɔvã ote nɛ oti akū, tasisi oti, mɔ bu aga mɔ ama.”

XX Onyole a bi ye kī, “Fɔtsa Ɔtsanɛ, kito nɛ yī tibisɛ kame kī makɛna nɛ tɛbla a flee akū.”

XXI Yesu dā ye kɛnaana nɛ ɔɔɔ kame, ade ebi ye kī, “Kite nɔ letsa mɔa. Naa kanaafila fɔtsa a kī odeĩ a flee kanɔ, kakɔa sika a kakpa ahiãfɔ, lokɔa aadani ɔkɛna osikani nɛ ode. Ke liti a, ya kayaatomɔ yī!”

XXII Kī onyole a nu fɔletsã kī a, emuna anɛ ade ɛɔzakū mɔ ayɔlɔhɔ a, kitonɛkī ena akū.

XXIII Yesu dā ye fɔtsã bakɔlɛnɛ a ɛtsɛna ade ebi be kī, “Fɔana ɔsĩ paa fɔkpa osikafo kī baawo nɛ Baguma legãkanyakɔ̃ a.”

XXIV Fɔletsã kī dzuli ye fɔtsã bakɔlɛnɛ a akū. Lɛmɛ Yesu buki ebi be kī, “Yī babi, Baguma legãkanyakɔ̃ a kame kawo deĩ ɔsĩ paa fɔkpa asikafo. **XXV** Fɔadã bɔɛɛ fɔkpa ɔpɔnkɔ mɔ kapu kī yaatsã ɔnɔbɔ̃ ɔke kame ɛnɛ kɛba kī osikani aawo nɛ Baguma legãkanyakɔ̃ a.”

XXVI Fɔletsã kī a kɛna fɔtsã bakɔlɛnɛ a wãwã paa. Ade bɛkavia akū kī, “Lokɔa oweĩ kɔũ aapuli ena nkpā katɛ?”

XXVII Yesu dā be kɛnanaana ade ɛlɛ kī, “Batidziwa sɛkɛ mɔ fɔlãapuli fɔya, lɛmɛ nné mɔ Baguma, kitonɛkī letsã nyɛ letsã adã bɔɛɛ lekpa Baguma.”

XXVIII Ade Petro le kī, “Dã, bɔfɔne letsa nyɛ letsa awe buyi boya butomena nɔ.”

XXIX Yesu le kī, “Mabi mi ne ɔnɔkoali kame kī odi nyɛ odi efɔne ye tɔtɔ eyi, ïye bawaɛnyole mɔ bawaɛtsole, ïye ɔma, ïye ɔlega, ïye ye babi, ïye fɔba eyi ne yĩ mɔ Kale Wĩ a sũ ni, XXX yaana fɔtsa pii eba ne lɔko kĩ kame. Yaana fola titi ɔha, bawaɛnyole mɔ bawaɛtsole, bama mɔ babi, mɔ fɔba, mɔ bati liti katomena. Ade ne lɔko kī laya kame a, yaana nkpã kī elá kawũna da a. XXXI Leme bati pii kī benye batɔnyade a finyaa aakpa liti, ade bati batide finyaa aakena lɔto banyane.”

Yesu Le Kale Lelaledɛ Ne Ye Wuda Akũ.

XXXII Finyaa Yesu mɔ ye fɔtsa bakɔlene a yele banaa Yerusalem. Yesu nyaa be lɔto ade fɔkena ye fɔtsa bakɔlene a saa a, bati a kī bitomɔ be ne liti a kavila. Yesu buki eve ye fɔtsa bakɔlene ewua-nviã a enamena ɔɔwẽ ade ekabi be letsa a kī laaya ne ye akũ a. XXXIII Ebi be kī, “Mitse! Bɔanaa Yerusalem awã kī baakɔa Otidziwa Obi a bido ne basɔfɔnɔkɔẽ mɔ mbla batsane a awe. Baako ye kɔto bekpa wuda lɔkɔa bekɔa ye bido ne bikĩ benyé Yudafɔ awe. XXXIV Baadi ye nsekuo, bitua tane biko ne ye akũ, baabo ye mɔ mple ade baako ye a, leme ne luwi lelaledɛ akũ a, yaayidza edzi nkpã.”

Yakobo Mɔ Yohanes Wã Yesu Banɔkɔẽ Fudzikɔ.

XXXV Ke liti a, Zebedeo babi kī benye Yakobo mɔ Yohanes ya ne Yesu sekẽ ade bibi ye kī, “Fɔtsa ɔtsane, boawe kī kena letsa a kī boavia nɔ a kakpa boe.”

XXXVI Yesu via be kī, “Litsa fɔane?” XXXVII Bibi ye kī, “Nte ɔne odzi ne no legākpo akū ne no kukūkpale kame ni, boawe kī budzi ne no ɔwē, boe kame ɔmɔa ne no sɔmɔna, ɔmɔa lɛme ne no sebã.”

XXXVIII Yesu bi be kī, “Minyína letsa kī de milamena kavia a! Mite mido kī míapuli mimɔa lubo kamɔ kɔɔpu a kī kene kī mmɔa? Iye míapuli mite mui kawɔla a kī maate a?”

XXXIX Bekpa mbuaye kī, “Bóapuli.”

Yesu bi be kī, “Oo, míapuli mimɔa kɔɔpu a kī maamɔa a, mɔ mui kawɔla amanie a kī maate a. XL Lɛme nlá osi kī mapau oti a kī ye aadzi ne yī sɔmɔna ñye sebã. Baguma nye oti a kī yaakɔa foe ekpa bati a kī emanɛ foe eyi a.”

XLI Kī fɔtsa bakɔlene ewua nkaɛ nu fɔletsã kī a, bɛna kalɔkpa ne Yakobo mɔ Yohanes akū. XLII Foesū Yesu ve be ekpɔta ebi be kī, “Minyina kī bati a kī babu kī benya tɔnɔkɔɛ ne amamufɔ akū a, deñ kobɛ ne be akū, ade banɔkɔɛ kī deñ otumi ne be akū a. XLIII Lɛme ketáne kī fɔana lomɔ ne mi kame. Nte mi kame odi awe kī yanya ɔnɔkɔɛ ni, kene kī enya mi ɔsumune. XLIV Nte mi kame odi we kī yanya ɔnɔkɔɛ ni, kene kī enya be nkaɛ a ɔsumune. XLV Kitonekī Otidziwa Obi a malo táya kī bisum ye, mbom eya kī yasum bati ekɔa ye nkpã ekpa lɔkɔa ete bati pii nkpã.”

Yesu Tsa Bartimeo Ɖnekune a.

XLVI Ke liti a, Yesu mɔ ye fɔtsa bakɔlene a yawo Yeriko. Kī banɛ ne ɔmato a kame a, bati kɔdabu bañ tomo be. Kī banaa ne osi a, bɛmó ɔnekune odi kī bave Bartimeo, Timeo obi kī edzi ne osi ɔwē yawã fɔtsa. XLVII Kī enu kī Yesu Nazaretni a

leyaatē a, edo fowola kaboa awe kī, “Yesu! Dawid obi! Mo yī konya!” XLVIII Bati pii wūni ne ye akū kī esua onukpē. Leme ebua fowola kooba eba kī, “Dawid obi! Mo yī konya!”

XLIX Yesu fō edza ade ele kī, “Mive ye mikpa yī.”

Foesū beve onekune kī bibi ye kī, “Fō owole eka edzi nō! Yidza mo atse, yave nō.” L Awā naa eta ye atadie wulaa eyi ne owē eyidza edza, enaa Yesu sekē.

LI Yesu via ye kī, “Litsa awe kī nkena nkpa nō?”

Onekune a bi ye kī, “Fotsa Otsane, fō mbuki mmó foko!”

LII Ade Yesu bi ye kī, “Naa. Nō katekado tsa nō.” Deedimape ye ane binya emó foko, ade etomō Yesu ne osi a akū a.

XI

Yesu Wo Ne Yerusalem Omato Kame Nde Legā Aye.

I Kī bifuā Yerusalem a, bekoa bawo Betfage mo Betania temato a, beyawo Kugua Futse Oto akū. Ne awā Yesu do ye fotsa bakolene nviā kī benya loto, II mo oledo kī, “Minaa akula a kī ewaa ne loto a kame. Nte miwo ye kame pe, miamō aflim obi kī bido owē bedzela kī odima tādzi tō ne ye akū. Miwūnya ye ne owē kame mikoa miyamena. III Nte odi via mi kī, ‘Nde sū miawūnya ye’ ni, mibi ye kī mi Olate sī ye, ade yaakoa ye emena moatse a.”

IV Foesū bati a naa, ade benamō kī bido aflim obi owē edzē ne oblonu akū ne kola onyukpē. Ade kī bekawūnya ye ne owē kame a, V bati badi

kĩ bedza ne awã a via be kĩa, “Litsa miakena ne awã? Litsa sũ miawũnya aflim obi a?” ^{VI} Bekpa mbuaye nde ayekĩ Yesu bi be a, ade bati a kpa be osi benye ye a. ^{VII} Kĩ bekɔa oyae a bema Yesu a, bedzele be tilima biko ne ye akũ, ade Yesu de edzi ne ye akũ a. ^{VIII} Bati pii dzele be tilima biko ne osi akũ, ade badi lemɛ veli tenane mo tɔɔta biko ne osi akũ a. ^{IX} Bati a kĩa benyaa loto mo bikĩ bitomɛna ye a do fɔwɔla kabɔa kale kĩa,
 “Hosiana! Mimu Baguma!

Baguma hila oti a kĩa yaya ne ɔlate a dĩa akũ!

^X Baguma hila Boe ɔlega Dawid legākanyakɔ a kĩa kaya a!

Hosiana deĩ ne ode flee flee!”

^{XI} Kĩ Yesu wo Yerusalem a, enaa Yudafɔ Asoli Kɔla a kame, ade eko ane edã letsa nye letsa etɛmɛna a. Lemɛ kĩa kade lamɛna kado sũ ni, bemɔ ye fɔtsa bakɔlene a ewua-nviã dzakũ benaa Betania.

Yesu Dumu Kutse Kudi Kĩa Kɔtawũ Babi.

^{XII} Kĩ kade nyina bimuniki bito Betania baya a, kɔle kɔ Yesu.

^{XIII} Emó kutse kudi kĩa kɔawũ babi kĩa bave figi mo lugo, kɔtale mo tɔɔta beblebee ne koe akũ. Foesũ enadã nte yaana babi badi ne koe akũ. Lemɛ kĩa ewo kutse a kayɔ a, etámo babi badimano, mbɔente tɔɔta nene teĩ, kitonekĩ kutse a kawũ lɔko táwo tɔ ɔto. ^{XIV} Ade Yesu bi kutse a kĩa, “Odimano leláabuki enya no babi dadaada!” Ye fɔtsa bakɔlene a nu foe.

Yesu Blɔmɛna Kɔyaato Banyane Ne Baguma Asoli Kɔla a Kame.

XV Kĩ biwo Yerusalem a, Yesu naa Asoli Kɔla a kame ade edo bati a kĩ bekano fɔtsa, mo bikĩ bekaya fɔtsa a kablɔmena kanemena awe a. Edu sika babẽne a tupunu ewula, ade edu bikĩ bidzi bano mblɔduma a leme fukpo ewula a.

XVI Ade etákpa osi malo kĩ odima abɔe letsama etsã kɔla kame etẽmena a. **XVII** Ke liti a, etsa bati a fɔtsa ele kĩ, “Betsɛle ne Katsɛle Kpalɛwa a kame kĩ Baguma le kĩ,

‘Baave yĩ Asoli Kɔla kĩ

kame katinya kame bati flee mpaɛ kabɔakõ.’
Leme midani koe mikena bayekpane kabelakõ!”

XVIII Basɔfɔnɔkõẽ mo mbla batsane a nu foletsa a kĩ Yesu le a, foesũ bewɛ osi a kĩ baatsã beko ye. Leme bivila ye kitonẽkĩ ye fɔtsa katsa a nyene bati kodabu a flee akũ.

XIX Kĩ kiwo olobe loko a, Yesu mo ye fɔtsa bakolene a ne ne omato a kame.

Yesu Tsa Fɔtsa Ne Mpaɛbo Mo Katekado Akũ.

XX Luwi leyade onone tutuutu kĩ betse ne osi banaa a, bemó kĩ kutse a kĩ kɔawũ babi a ku kito lolɔ kenawo tunu akũ. **XXI** Petro te anɛ ne letsa kĩ leya a akũ, ade ebi Yesu kĩ, “Fɔtsa Ōtsane, dā! Kutse a kĩ odumu a ku!”

XXII Yesu bi be kĩ, “Mite Baguma mido. **XXIII** Mabi mi ne onokɔali kame kĩ odi nye odi kĩ yaabi oto kĩ kĩ ebɔle enaato ne mpo kame, mo etáte atsendze ne owɔle kame mbom ete edo kĩ letsa a kĩ ele a aaya ne foe kame ni, fɔaya lomɔ. **XXIV** Foẽsũ mabi mi kĩ letsa nye letsa kĩ míavia Baguma ne mpaɛbo kame ni, mite mido kĩ mina foe, ade Baguma aakpa mi foe a. **XXV** Ade nte midzẽ miabɔa mpaɛ mo mimó kĩ oti odi fum

mi ni, mikɔa mite ye ayekĩ mi ɔlega ne ode a leme aakɔa mi tɔkpa ete mi. ^{XXVI} Leme nte mitákɔa bati tɔkpa mite be, mi ɔlega ne ode a leme leláakɔa mi tɔkpa a ete mi!”

Bati Via Yesu Ye Kɔbẽ Katokõ.

^{XXVII} Ade Yesu mo ye fɔtsa bakolene a buki benaa Yerusalem a. Kĩ Yesu ne etsẽ yamini ne Asoli Kɔla kame a, basofonokõẽ, mbla batsane a mo omato banokõẽ badi ya ne Yesu sekẽ, ^{XXVIII} ade bivia ye kĩ, “Kɔbẽ ɔdabe ɔne akena fɔtsa kĩ? Owei lekpa no osi kĩ kena fɔtsa kĩ?”

^{XXIX} Yesu kpa be mbuaye kĩ, “Maanya loto nvia mi kale moape. Nte mikpa ke mbuaye ni, maabi mi kɔbẽ a odu kĩ nne makena fɔtsa kĩ. ^{XXX} Mibi yĩ Yohanes bati mui kawɔla a ni, Baguma sekẽ futo mbɔe kĩ batidziwa sekẽ futo? Mikpa yĩ mbuaye.”

^{XXXI} Biyi fukĩ kavere ne be kame awe ade bele kĩ, “Litsa bóale? Nte bóle kĩ kɔbẽ a to Baguma sekẽ ni, yaavia boe kĩ, ‘Kekõ litsa sũ mitátate Yohanes mido?’ ^{XXXII} Mbɔe bóale kĩ futo batidziwa sekẽ?” Leme bavila bati kodabu a, kitonekĩ odi nye odi abu Yohanes kĩ enye Baguma onukpẽ onyene.

^{XXXIII} Foesũ bekpa Yesu mbuaye kĩ, “Bunyína.”

Ade Yesu bi be kĩ, “Yĩ malo nláabi mi awã kĩ kɔbẽ a to nne makena fɔtsa kĩ!”

XII

*Yesu Bɔa Legbã Ne Waĩ Kɔba Akũ
Badãmenane Akũ.*

¹ Ke liti a, Yesu tsa be fɔtsa ne fɔgbã kame ele kĩ, “Onyole odi ne waĩ futse kɔba, edzi kɔbã esinya

koe. Enye leke ne koba a kayite, awã kĩ yaana kutse babi a ekpota, ekakã mui a kako. Ade eke kola geĩ kudi, ayekĩ koe akũ odāmenane a aadzi ekadã koba a akũ. Ekõa koba a edo ne apaafõ awe kĩ bekaadã koe akũ, ade edzakũ enaa osi akũ a. **II** Kĩ loko wo oto kĩ baana babi a, onyole a do ye osumune ne be sekẽ kĩ enaate ye kanyakõ ema ye. **III** Leme ye apaafõ a pi foto onyane a bibo ye ade beblomõ ye mo awe pupulidza a. **IV** Onyole kĩi buki edo foto onyane bebã. Kĩ enaa a, apaafõ a bo ye, bipila ye ne lolõ, bido ye konyõã leme. **V** Koba olate a buki edo foto onyane bebã, adeke beko ye a. Ade aye bekena babebã pii a. Bibo badi, beko babebã leme.

VI “Oti kĩ ete kĩ yaado nye ye moawe obi kĩ yaátunõ kale. Ne kawũna kame a, edo ye obi a kĩ yawe kale paa a, ele kĩ, ‘Mate kado kĩ baakpa yĩ obi kĩi kõ obu.’

VII “Leme koba akũ badāmenane kĩi bi be akũ kĩ, ‘Ade adzapadiẽ onyane a ne awĩ a. Miya bokõ ye ayekĩ ye adzapadiẽ a aakena boe ade!’ **VIII** Foesũ, bipi obi a beko ye, beta bimuni ne waĩ kobã a liti.”

IX Ne awã a, Yesu via bati a kĩ, “Litsa waĩ koba olate a aakena? Yaaya gyaako apaafõ a ekõa waĩ koba a edo ne bati bebã awe. **X** Mbõẽ mitákã ne Katsẽle Kpalewa a kame kĩ,

‘De a kĩ fola bakene sĩ a,
ade de leyadani kola okonto akũ de a.

XI Baguma lekena fõtsa kĩi,
ade fonye awãwã fõtsa ne boe ane a!’ ”

XII Yudafɔ banɔkɔɛ a we kɔ bapi Yesu, kitonekɔ bemo kɔ eboɔ legbã a etia be, leme bivila bati kodabu a, foesu befone ye ade bedzakũ a.

Bivia Yesu Ɔgɔle Kate Akũ Fɔletsɔ.

XIII Ke liti a, bido Farisifo badi mo bikɔ bitomena Herodes a kɔ benaa Yesu sekɛ, benaanaɔ ye ne tedake kame mo fɔletsɔ kavia bekɔa bipi ye.

XIV Kɔ beya ne ye sekɛ a, bibi ye kɔ, “Fɔtsa Ɖtsane, bunyina kɔ ale ɔnokɔali daa, ade ɔtsɛla letsɔ a kɔ bati akɔna ne no akũ a. Aádã oti anɛ, mbom atsa Baguma akũ ɔnokɔali osi a. Bi boe nte boe Mbla kpa osi kɔ bute ɔgɔle bokpa Roma Legãnokɔɛ. Bute mbɔɛ kɔ botate?”

XV Leme Yesu mó be tedake a, foesu evia be kɔ, “Nde sũ miawe kɔ miaso yɔ midã? Mikɔa sika a miyamena ndã!” **XVI** Bekɔa somɔa bema ye, ade evia be kɔ, “Owei lolɔ mo dɔ teɔ ne se akũ?”

Awã naa bekpa mbuaye kɔ, “Roma Legãnokɔɛ Kaisare.”

XVII Ade Yesu bi be kɔ, “Kekɔ mikɔa letsɔ kɔ lenye Kaisare lide a mikpa ye, ade letsɔ kɔ lenye Baguma lide a leme ni, mikɔa mikpa Baguma.”

Fukɔ fɔ akũ nyene be ne Yesu akũ.

Fɔletsɔ Kavia Ne Kayidza Kato Kanɔkpa Akũ.

XVIII Ade Zadukifo kɔ bale kɔ bati kayidza kato kanɔkpa lelãa a kame badi ya ne Yesu sekɛ, beyavia ye kɔ, **XIX** “Fɔtsa Ɖtsane, Mose tsele mbla kɔ eyi ekpa boe kɔ nte onyole odi ku efone ɔtsɔ kɔ bemo ye betãma ni, owaɛnyole ekɔã okunawa a, lokɔa bema babi bekpa ɔtonyade a. **XX** Fɔya kɔ bawaɛ evũkɔno badi dzi nkpã. Ɖnokɔɛde a kɔã ɔtsɔ ade eku a, kɔ betãma obi odima. **XXI** Ade

oyade a koã otsole a, ade ye malo eku, kī betáma obi odima. Owaẽ olalède a lemε koã otsole a, ade ye malo eyaku kī betáma obi odima. **XXII** Ade aye a be evūkɔno a koã otsole a, lemε be flee a biku kī bemo otsole a betáma babi. Ne foe kawūna a otsole a lemε yaku. **XXIII** Ne kayidza kadzi nkpā kame mo nte biyidza a ni, be kame owodabe otsō otsole a aanya? Be evūkɔno a flee bekoã ye tō?”

XXIV Yesu kpa be mbuaye kī, “Mikena mfumsu, kitonekī minyina Katsela Kpalawa a foletsa iye Baguma kobē a. **XXV** Nte banokpa yidza bidzi nkpā ni, baana nde ode foto banyane ade beláakoã batsō a iye bidzi fonyo a. **XXVI** Lemε ne banokpa kayidza akū ni, mitákā ne Mose ovoli a kame foletsa a kī Baguma le ne kutse a kī kokatē a akū? Baguma bi Mose kī, ‘Yi nye Abraham Baguma, Isak Baguma mo Yakob Baguma.’ **XXVII** Fukī atsa kī enye bati kī bidzi nkpā Baguma, nné banokpa Baguma yane. Mikena mfumsu paa!”

Mbla Wodabe Nye Atonyade Flefle?

XXVIII Ade Yudani mbla otsane odi kī ena ne awā a, nu foletsa kame kasa a. Emó kī Yesu kpa Zadukifo a mbuaye wī, foesū efuā Yesu evia ye kī, “Mbla wodabe nyaa Baguma tebla a flee loto?”

XXIX Yesu kpa ye mbuaye kī, “Betsela mbla a kī ebē a betsa kī, ‘Israelfo, mitse! Olate a nye boe Baguma, ade ye odi lemε deī a. **XXX** Foesū awe Olate, no Baguma a, mo no owole flee, mo no okla flee, mo no adzuni flee mo no kobē flee.’ **XXXI** Ade mbla siwa ayade nye kī, ‘We no okoba

kale nde ayekĩ awε nɔ akũ a.' Mbla adima buki εbέ tεbla kĩ."

XXXII Adeke mbla ɔtsanε a kpa mbuaye kĩ, "Fɔtsa ɔtsanε, ɔle foe kale wĩ. ɔnɔkɔali fɔanε nde ayekĩ ɔle kĩ ɔlate a odi nye Baguma, ade Baguma adima buki εláa keba ye odi a.

XXXIII Foesũ kenε kĩ oti εwe Baguma kale mɔ ye ɔwɔle flee, ye adzuni flee mɔ ye kɔbẽ flee. Ade kenε kĩ εwe ye ɔkɔba kale nde ayekĩ yawε ye akũ kale a. Fɔnεnε kĩ oti ekena ne tεbla nviã kĩ akũ keba kĩ yaabɔa bayε mɔ afɔlie bebã ekpa Baguma."

XXXIV Kĩ Yesu mɔ kĩ onyole a kpa ye mbuaye ne nyansã kame a ni, ebi ye kĩ, "Mimɔ Baguma legãkanyakɔ a kayite lelá lugo." Ne fukĩ liti a, odimanɔ tápuli edo ɔwɔle evia Yesu kale kadima.

Fɔletsa Kavia Ne Oti a Kĩ Enye Kristo a Akũ.

XXXV Kĩ Yesu katsa fɔtsa ne Asɔli Kɔla a kame a, evia be kale kĩ, "Nde fɔla sũ mbla batsanε a aapuli bele kĩ Kristo a aanya Legã Dawid kasinu obi? **XXXVI** Hũhũ Kpalεwa a lefɔ Dawid le eyi kĩ, 'Baguma bi yĩ ɔlate kĩ,

"Kena akũ kadzi ne yĩ somɔna ne awĩ, kenawo kĩ maakɔa nɔ bakesĩne ndo ne nɔ abɔa kayɔ." '

XXXVII Kĩ Legã Dawid mɔawε ve ye kĩ ɔlate a ni, nde fɔapuli fɔya kĩ Kristo a aanya Dawid kasinu obi?"

Bati kɔdabu baũ dza ne awã bekatse Yesu fɔletsa a mɔ kawɔle.

Yesu De Bati Ne Mbla Batsanε a Akũ.

XXXVIII Kĩ Yesu katsa bati a fɔtsa a ebi be kĩ, "Midã kadã wĩ ne Yudafo mbla batsanε a akũ.

Bado tetadie wulaa katsã kawε kī bati bewõna be ne obu kame ne koyaato. XXXIX Bawe banokõε fudzikõ kadzi ne be fotsenakõ mo obu fudzikõ kadzi ne kanyakõ. XL Basisi bakunawa kate be toto ne be awe. Baboa mpae geleele kakoa kapia be akũ. Be soto kavele aana osĩ seba bati bebã fude.”

Okunawa Ohiãni Odi Te Ogole.

XLI Ade Yesu nadzi ne Asoli Kola a kame efuã ogole kate adakã a, ekadã ayekĩ bati lamo sika kata kado a. Asikafõ pii ta sika baũ baũ bido ne ye kame. XLII Adeke okunawa ohiãni odi leme ya ade ekoa kaple nviã edo ne adakã a kame a.

XLIII Ne awã a Yesu ve ye fotsa bakolene a ekpota ebi be kī, “Onokwali mabi mi kī okunawa ohiãni kī letsa a kī edo ne ogole adakã kame a pone fobẽ bati a flee fude. XLIV Kitonekĩ bati bebã a koa akũ kana fotsa a kī fute a fudi beyate ogole, leme otsole ohiãni kosokoso kī kõ, letsa kī edeĩ a flee ekoa ete. Ekoa letsa a kī de akũ yaadzi nkpã a eyate ogole.”

XIII

Yesu Le Yerusalem Asoli Kola a Kabubuli Akũ Foletsa.

I Kī Yesu ne eto Asoli Kola kame yanaa a, ye fotsa bakolene a kame omoa bi ye kī, “Fotsa Otsane, dã fola mo kale mo boe kpale kī!”

II Yesu bi ye kī, “Amo fola kpale kpale kī. Belátina de a kame lidima ne lokoba akũ kī beláadu biwula! Baatinya de lidi nye lidi biwula.”

Lubokamo Mo Bati Liti Katomena.

III Kĩ Yesu ne edzi ne Kugua Futse Ɔto a akū, etselamo Asoli Kola a, Petro, mo Yakobo, mo Yohanes mo Andrea ya ne ye sekẽ beyavia ye pɛtɛɛ kī, IV “Boe Ɔlate, loko wɔdabe fukī aaya ne foe kame? Bi boe fɔtsa a kī fɔaya fɔkɔa fɔtsa kī loko a wo ɔto kī fɔtsa kī flee fɔya ne foe kame.”

V Ade Yesu bi be kī, “Midã kadã wī, ade mitafõ odima leke mi a. VI Bati pii aaya ne yī dī akū bibi mi kī, ‘Yī nye Kristo a!’ ade baake bati pii a. VII Ɔwɔle etabɔle mi nte minu kawũkano nkã ne mi ɔwẽ iye kawũkano akū foletsa mo lugo. Kene kī fɔtsa kī bame odu fɔya ne foe kame, leme fɔátsa kī katinya kame kawūna a wo ɔto. VIII Ɔmaĩ mo ɔmaĩ aano akū. Legãkanyakõ aayidza ne legãkanyakõ akū. Tite aakuna ne foko kumekume, ade kɔle aaya a. Leme fukī flee la nde seme kapi kayɔkayi lubo kamɔ a aye.

IX “Kene kī mi moawe a miana ne konete kame. Baapili mi loko bekɔa mi benamena foletsa kadzekõ. Baabo mi ne fɔtsenakõ. Baafõ midza ne fɔgã mo ɔmaĩ banɔkɔẽ ane ne yī sū, loko mibi be Kale Wī a. X Leme fomɔ katinya kawūna a aaya ni, kene kī benya loto bide letsã ne Kale wī a akū bekpa fude fude a flee. XI Nte bipi mi bekɔa mi benamena foletsa kadzekõ ni, mitanya loto mibo akū ne letsa a kī míale a akū. Nte loko a wo ɔto ni, mile letsa nye letsa kī baakpa mi kī mile a. Kitonekī foletsa a kī míale a lelãanya mi fude, mbom fɔato Hũhũ Kpalewa a sekẽ.

XII “Bati aakɔa be moawe bawaẽ bekpa kī beko, ade balega leme aakena foe moape a ne babi akū. Babi aayidza bedza ne be bamane akū, befõ beko be. XIII Odi nye odi aakesĩ mi ne yī sū. Leme

odi nye odi kī yaadza pintii kenaawo ye nkpā kawūna ni, Baguma aakpa ye nkpā.”

Yesu Tsa Ayekī Bikī Bitomō Ye a Aamō Lubo Mō Liti Katomena.

^{XIV} Yesu buki εε kī, “Nte mimó fukesĩtsa mō libe kī fōako omaĩ kī fōdzē ne awā kī ketáne kī fōna a ni, ovoli okāne a enu foe kayo kanu wī, lōkōa bati a kī bideĩ ne Yudea a bilo benaa toto akū. ^{XV} Oti kī edzi ne ye kōla letsā a, etaduma eya ne tite kī yaabōe litsedi etomena ye kōla kame ekpa ye akū. ^{XVI} Oti kī edeĩ ne ye kōba kame etamuniki enaa kōla kī yanaabōe ye lima. ^{XVII} Bōbōe makpa batsole a kī betsemō fōma mō bikī benēe babi kī bameme ne lōkō a na kame. ^{XVIII} Mibōa mpae mikpa Baguma kī fōtsa kīĩ fōtaya ne osili lōkō! ^{XIX} Kitonekī lubo kamō a kī laaya ne lōkō a na kame aana osĩ leba lidi nye lidi kī leya to ne katinya kame, kito ne kayokayi kī Baguma bōa katinya a keyawo finyaa. Adeke lubo kamō kīĩ odu lelāabuki leya dadaada a. ^{XX} Leme Olate a tinya lubo kamō fuwi a akū. Nte ne aye ni, kufe odima lelāana nkpā. Leme ne ye bati a kī epau a sū ni, etinya fuwi a akū.

^{XXI} “Foesū nte odi bi mi kī, ‘Dā! Kristo a deĩ ne awī,’ iye ‘Edeĩ ne akīĩ,’ mitate ye mido! ^{XXII} Kitonekī fōvā Kristo ame, mō fōvā Baguma onukpē banyene aane. Baakena awāwā fōtsa mō nsentseleni pii kī nte baapuli ni, baakōa beke bati a kī Baguma pau a malo. ^{XXIII} Mi kō midā kadā wī! Mbi mi letsa nye letsa ĩnyamena loto fōmō lōkō a aawo oto.”

Otidziwa Obi a Kaya.

XXIV Yesu ɛ enamena lotɔ kī, “Nɛ fuwi a kī fɔaya nɛ lubo kamɔ fuwi liti a,

‘suwa aadī sɛkɛna tūū,
odetɔ lɛmɛ lɛlɛábuki ɛvɔɛ.

XXV Fusibii aato ode fɔtɔ,
ade odetɔ kamɛ kɔbɛ a kī kupini ode a
aakuna akū.’

XXVI “Ke liti a, baamɔ Otidziwa Obi a, kī ɛnɛ yaya nɛ liflututu kamɛ mɔ kɔbɛ mɔ kukūkpɛɛ baū. XXVII Adeke yaado ode fɔtɔ banyanɛ a kī bɛnaakpɔta bati a kī ɛpau eyi a, bitomɛna katinya kamɛ tukonto ɛna a kamɛ kito tite kakpulakɔ kɛnaawo ode kakpulakɔ.

Fɔtsa Kakɔɛ Nɛ Kutse Kī Kɔawū Babi a Akū.

XXVIII “Mikɔɛ fɔtsa nɛ kutse kī kɔawū babi a akū. Ntɛ fɔya kī mimɔ kī kutse a na nɛ tenanɛ kɔnyɛ tɔɔta vɔɛ ni, minyi kī ovio lokɔ fuā. XXIX Ade aye ntɛ mimɔ kī fɔtsa a kī do kaya awɛ pɛ, minyi kī lokɔ a fuā, ade liti liwo onyukpɛ malo a. XXX ɔnokɔali a mabi mi kī mi letsā babi a flee lɛlɛáaku fɔmɔ fɔtsa kī flee aaya nɛ foe kamɛ. XXXI Tite mɔ ode flee aayatɛ, lɛmɛ yī kalɛ a kɔ lɛlɛáatɛ da.

XXXII “Lɛmɛ luwi a ãyɛ ɔɔɔū a, odima linyína de. Ode fɔtɔ banyanɛ a mɔ Baguma Obi mɔawɛ a malo linyína, mbɔɛntɛ ɔlɛga a odi keī nyina. XXXIII Midā kadā wī mina nɛ kukūmanɛ kamɛ, kitonɛkī minyína luwi a kī de akū lokɔ a aawo ɔtɔ. XXXIV Fɔana ndɛ ayekī onyole odi naa osi akū, ade ɛfɔnɛ ye tɔtɔ eyi ye basumunɛ a. ɛkpa odi nyɛ odi ye kɔbɛ mɔ adzuma kī ɛkɛna. Ke liti a, esi onyukpɛ ɔdāmenanɛ a mbla kī ɛna nɛ kukūmanɛ kamɛ.

XXXV “Ne foesũ mina ne kukũmanε kame, kitonekĩ minyĩna loko a kĩ toto ɔlate a aaya. Fɔapuli fɔnya olobe loko ĩye lenye kayite ĩye odenyinawi ĩye ɔnɔne. XXXVI Nte eyafuta mi ni, etayaamo mi kĩ miwaa tida. XXXVII Letsa a kĩ mabi mi a, ade foe moape a mabi bati flee kĩ mina ne kukũmanε kame.”

XIV

Yudafɔ Basɔfɔnɔkɔɛ Napi Adzuni Ne Yesu Kako Akũ.

^I Kite fuwi nviã kĩ Yudafɔ aanya Wuda Katɛ Luwi, kĩ bate ane ne be kadzakũ ne Egipte akũ a, mo Abodoo Kĩ Etáyila Luwi. Basɔfɔnɔkɔɛ a mo mbla batsane kawe osi a kĩ baatsã ne kabela kame bipi Yesu beko ye. ^{II} Bele kĩ, “Ketáne kĩ bokena foe ne fuwi kanya a kame, kitonekĩ bati aado ɔtutũ ne omaĩ a kame.”

Otsole Odi Tsela Yesu Kugua Ne Betania.

^{III} Yesu na ne Betania ɔmato kame ne Simon kĩ eso tɔ foso ngbã a awã. Kĩ Yesu dzi ekanya a, otsole odi kĩ enee tumpã kĩ eyi mo kugua mo ɔlɛ kĩ kote kɔya paa a wo ne kola a kame. Otsole a binya tumpã a ade etsokui kugua a flee eko ne Yesu lolɔ kame a.

^{IV} Ade bati a kĩ bedzɛ ne awã a badi na kalokpa bele kĩ, “Litsa sũ yabula kugua mo kɔya kĩi kade? ^V Baapuli beno kugua mo ɔlɛ kĩi foba sika ovoe fobo oha elale, lokoa bekoa se bekra ahiãfo.” Ne foe sũ, bekã ye ane mo osĩ.

^{VI} Leme Yesu le kĩ, “Mifone ye awe. Litsa sũ miaha ye? Ekena letsa wĩ ekpa yĩ. ^{VII} Ahiãfo aana ne mi kame daa, ade miapuli mibumena

be loko kī miawε a. Yī kō nláana ne mi sekē daa. ^{VIII} Otsole a kena letsa kī yaapuli. Enya loto etsela yī sukena kugua kī yamane yī eyi ekpa yī kabila. ^{IX} Mabi mi ne ɔnokɔali kame kī kako nye kako kī baade Kale Wī a letsā ne katinya kame flee ni, baale kɔdzela ne letsa kī otsole kī kēna a akū bekɔa bite ye anε.”

Yuda Tunɔ Kī Yaanye Yesu Ekpa.

^X Ke liti a, Yuda Iskariot kī enye foto banyane ewua-nviā a kame ɔmɔa naa Yudafɔ basɔfɔnokɔē a sekē kī yaanye Yesu ekpa be. ^{XI} Kawɔle de be ne fɔletsa a akū, ade be malo bike otse kī baakpa ye sika a. Foesū Yuda kawε osi a kī yaatsā enye ye ekpa be.

Yesu Nya Wuda Katē Funitsā Mɔ Ye Fɔtsa Bakɔlene a.

^{XII} Ne Abodoo Kī Etáyila Kanya Luwi letɔnyade a kī bako Wuda Katē Kavelibi a akū a, Yesu fɔtsa bakɔlene a via ye kī, “Ndia awe kī bɔlɔla bɔkpa nɔ luwi a funitsā kanya?”

^{XIII} Ade Yesu do be kame bati nviā, mɔ ɔlɛdo kī, “Minaa ɔmato a kame, oti odi kī enɔne kugumi aatselamɔ mi. Mitomɔ ye miwo ne tɔtɔ a kī te kame yaawo a, ^{XIV} lɔkɔa mibi tɔtɔ ɔlate a kī, ‘Fɔtsa ɔtsane a bo, “Ndia banɔvɔē kola a kī bɔmɔ yī fɔtsa bakɔlene a aanya Wuda Katē funitsā a deī?” ’ ^{XV} Ade yaatsa mi abansulu kola baū awā kī behεhe biyi kɔkɔε. Milɔla awā mikpa boe funitsā a kanya.”

^{XVI} Fɔtsa bakɔlene a dzakū benaa ɔmato a kame, ade benamɔ fɔtsa flee ndε ayekī Yesu bi be a. Ade betɔ Wuda Katē funitsā a ne awā a.

XVII Kĩ olobe wo ɔto a, Yesu mo ye fɔtsa bakolene ewua-nviã ya ne awã. XVIII Ade kĩ bidzi banya a Yesu le kĩ, “Mabi mi ne ɔnokɔali kame kĩ mi kame ɔmoa, kĩ bomo ye budzi boanya aanye yi ekpa.”

XIX Fɔletsã kĩ ha be, ade bekavia ye ɔmoa ɔmoa kĩ, “Yi mane mbɔɛɛ?”

XX Yesu kpa mbuaye kĩ, “Enye mi ewua-nviã a kame ɔmoa, oti a kĩ ye awe dei ne soɔɔae kame mo yi a. XXI Otidziwa Obi a anaaku nde ayekĩ Katsɛle Kpalɛwa a le ne ye akũ a. Leme bobɔe makpa oti a kĩ yaanye Otidziwa Obi a ekpa a. Nte betama oti a na ni, kufe fonene fɔkpa ye.”

Boe ɔlate a Olobe Funitsã Kanya.

XXII Ade kĩ bekanya a, Yesu bɔe abodoo, enye Baguma kole ne ye akũ, ade ebuli ye ekpa ye fɔtsa bakolene a, ele kĩ, “Mite minya, ade yi sukena a.”

XXIII Ke liti a, ebɔe kɔɔpu mo waĩ, enye Baguma kole, ekɔa ekpa be flee bekate kamɔa.

XXIV Ade Yesu bi be kĩ, “Ade fukĩ nyɛ yi apam babɔane a kĩ biwula ne bati pii lolɔ a. XXV ɔnokɔali a mabi mi kĩ nláabuki mmɔa waĩ adima kenaawo luwi a kĩ maamɔa waĩ vɔɛ ne Baguma legákanyakɔ a.”

XXVI Ke liti a, besã tɔno bimu Baguma, ade bene benaa Kugua Futse ɔto a akũ a.

Yesu Le Eyi Kĩ Petro Aasĩ Kĩ Enyina Ye.

XXVII Yesu bi be kĩ, “Mi a flee míalo mifone yi, kitonekĩ bele ne Katsɛle Kpalɛwa a kame kĩ, ‘Maako baveli akũ ɔdãmenane a, ade ye baveli a flee aapansam a.’”

XXVIII Leme nte bedzela yĩ ndzi nkpã ni, maanya mi loto ne Galilea.”

XXIX Ade Petro bi ye kĩ, “Yĩ kō, nláalo nfone no da, nte be nkae a flee lo malo!”

XXX Yesu bi Petro kĩ, “Mabi no ne onokwali kame kĩ fomō okoko aabe titi nviã lenye kĩ ni, aale titi elale kĩ onyina yĩ.”

XXXI Leme Petro buki ebi ye mo osĩ kĩ, “Nte kene kĩ bomō no buku malo ni, nláale kĩ ñnyina no!” Fotsa bakolene a flee le kale moape a.

Yesu Bwa Mpaε Ne Getsemane.

XXXII Beyawo kako kadi kĩ bave Getsemane, ade Yesu bi ye fotsa bakolene a kĩ, “Midzi ne awĩ lokoa nnaaboa mpaε.” XXXIII Ade ekpã Petro, Yakobo mo Yohanes ebumō ye akū a. Kaloe mo libe wo ne ye kame, ekatila blibli, XXXIV ade edani ebi be kĩ, “Ayoloho te yĩ owole kame paa nde maku. Midzi ne awĩ, mikaadã fokō.”

XXXV Kĩ enaa loto sukuloo a, eka etsa ne tite eboa mpaε kĩ, “Nte foadã boεε ni, lubo kamō lokō kĩ letē ne yĩ akū.” XXXVI Ade ele kĩ, “Nda, yĩ Olega, apuli kakena letsa nye letsa. Nye lubo kamō koo pu kĩ ne yĩ akū. Leme nné letsa a kĩ mawe, mbom letsa a kĩ no awe.”

XXXVII Ke liti a, emuniki eyamō ye fotsa bakolene elale a kĩ bewa tida. Ebi Simon Petro kĩ, “Simon, tida owaa? Otapuli odzi odã fokō doũhuile moape malo?” XXXVIII Ade ebi be kĩ, “Mina ne kukūmane kame lokoa mikaaboa mpaε ayekĩ miláawo ne sohuis kame. Hũhũ a awe leme sukena a kō lelá kobē.”

XXXIX Yesu buki emuniki enaboa mpaε ele foletsa moape a. XL Ebuki emuniki enaa ye fotsa

bakolene a sekẽ enamo kĩ bewa tida. Betápuli bibinya ane, tida deĩ ne be ane ade betányi letsa kĩ bale benye be akũ onukpẽ a.

XLI Kĩ ebuki emuniki eya lelalade a, evia be kĩ, “Tida mibuki miwaa miaweya? Fole! Ɔdoũ a wo Ɔto! Midã, bekɔa Otidziwa Obi a, bado ne tokpa bakenane awe. **XLII** Miyidza mifõ bɔnaa. Midã oti a kĩ yaanye yĩ ekpa a fuã.”

Bipi Yesu.

XLIII Yesu buki elamo kodzela fomɔ Yuda kĩ enye be ewua-nviã a kame ɔmɔa yane eta. Bati kodabu a kĩ basofonokõẽ mɔ mbla batsane mɔ ɔmato banokõẽ nye bibu a tomo ye, ade benee fopame glele glele mɔ titse fukũ a.

XLIV Oti a kĩ enye ye ekpa a kpa be nsentseleni eyi kĩ, “Oti a kĩ míamo kĩ ndzeme ye onukpẽ a ni, ade ye ne awã a. Mipi ye mikpã minamena, lokɔa mi ane ena ne ye akũ.” **XLV** Kĩ Yuda sila ewo awã a, enaa Yesu sekẽ eve ye kĩ, “Fɔtsa Ɔtsane!” ade edzeme ye onukpẽ a. **XLVI** Foesũ bipi Yesu, ade bipini ye kɔɔba a. **XLVII** Leme bati a kĩ bedzẽ ne awã kame ɔmɔa vele ye kopã enye ebaa Ɔsɔfonokõẽ Flee a ɔsumune soto emuni.

XLVIII Ade Yesu bi be kĩ, “Fusĩ kĩ miale apã mɔ titse fukũ miya kĩ miaayapi yĩ nde tokpa ɔkenane mane? **XLIX** Luwi daa mana ne mi sekẽ ne Asoli Kɔla a kame, katsa fotsa, leme mitãpi yĩ. Leme kene kĩ Katsɛle Kpalɛwa fɔletsa a fɔya ne foe kame.” **L** Ade ke ye fotsa bakolene a flee lo befone ye a.

LI Ne loko a kame a, opopobi odi kĩ esua aklala lima odi akũ tomena Yesu. Bati a we kĩ bapi ye,

LII Ieme ewolo ye lima edo be ne awe, ade elo mo odzo a.

Yesu Dza Ne Yudafɔ Ɔmaĩ Fɔletsɔ Badzɛnɛ Anɛ.

LIII Ade bekpã Yesu benamena Yudafɔ Ɔsɔfɔnɔkɔɛ Flee a toto kame, awã kĩ basɔfɔnɔkɔɛ, ɔmato banɔkɔɛ mo Yudafɔ mbla batsane a kpɔta a. LIV Petro tomena ne liti flee, eyawo ne Ɔsɔfɔnɔkɔɛ Flee a lowabe. Ekɛna akũ edzi ne basumune a owẽ bekawa fi.

LV Yudafɔ basɔfɔnɔkɔɛ mo fɔletsɔ badzɛnɛ a kĩ bidzi ne awã we fɔletsɔ kĩ batsua bite ne Yesu akũ bekoɔ beko ye wuda koto, Ieme betána fudima ne ye akũ. LVI Adansifo pii yama fovã bite ne ye akũ, Ieme be adansie kadi táketi mo akũ.

LVII Ade bati badi yidza bedza bema fovã kĩ, LVIII “Bunu kĩ ele kĩ, ‘Maabubuli Asɔli Kɔla kĩ kĩ bike mo awe a, ade ne fuwi elale liti ni, maake kɔbebã kĩ nné awe bekoɔ bike.’ ” LIX Ieme bati kĩ adansie malo táketi mo akũ.

LX Ɔsɔfɔnɔkɔɛ Flee a yidza edza ne bati a flee anɛ, ade evia Yesu kĩ, “Ɖláanye onukpɛ ne fɔletsɔ a kĩ belamo kale katia no a?” LXI Ieme Yesu sua onukpɛ étále kadima.

Ɔsɔfɔnɔkɔɛ a buki evia ye kĩ, “No nye Kristo, Nhila Ɖlate a Obi a?”

LXII Yesu bi ye kĩ, “Ye manɛ, ade míamo Otidziwa Obi a kĩ edzi ne Baguma Kpale a somona, ade yaato ode eya ne luflututu kame a!”

LXIII Ne awã a, Ɔsɔfɔnɔkɔɛ Flee a bẽ ye atadie kame ne kalokpa kame ele kĩ, “Botábuki busi odansini odima! LXIV Minu ye mbusuo fɔletsɔ a. Litsa nye mi adzuni?”

Adeke be flee bitunɔ yɔ kī eku koto ade efeta ekpa wuda a. **LXV** Be kame badi yi kayɔ mo tane katua kako ne Yesu akū, badi sua ye ane, bekake ye fukpeni kavia ye kī, “Bi boe owula kī ebɔa nɔ!” Ade badāmenane a kpā Yesu bebalebale ye awe ne toloto a.

Petro Sī Kī Enyína Yesu.

LXVI Kī Petro buki edzi ne lowabe a, abawa adi ne Ɔsɔfɔnɔkɔɛ Flee a toto kame a ya ne awā. **LXVII** Kī emɔ Petro kī edzi yawa fi a, ebɛ ane edā ye ade ebi ye kī, “Nɔ malo otomena Yesu Nazaretni a!”

LXVIII Ade Petro sī ele kī, “Īnyína letsama, ade maānu letsa a kī ale a malo a!” Ade ene enaa onyukpɛ a. Mo ye awā kawo pe mo ɔkɔko nye onukpɛ.

LXIX Abawa a buki emó ye ne awā, ade edo bati a kī bedzɛ ne awā kabi awe kī, “Ene be kame ɔmoa!” **LXX** Leme Petro buki esī.

Owi tábuna mo bikī bedzɛ ne awā bi ye kī, “Ɖláapuli osi kī onyé be kame ɔmoa, kitonekī nɔ malo Galileani ane.”

LXXI Ade Petro do kadum mo katani awe kī, “Ntani kī ɔnɔkɔali male, Baguma evele yī soto nte fɔvā mama. Īnyína oti a kī ye foletsa milamena kale a.”

LXXII Deedimɔape ɔkɔko be leyade, ade Petro te ane ne kale a kī Yesu bi ye a akū kī, “Fɔmo ɔkɔko aabe titi nviā ni, aale titi elale kī onyína yī.” Kī emɔ ye akū eyi ɔsū a, ebe blobbloblo.

XV

Bekpã Yesu Benamena Pilato Sekẽ Benadzemo Ye.

^I Onone tutuutu a basofonokõẽ a, omaĩ banokõẽ a, mbla batsane a mo foletsa badzene a tsena moatse benaa adzina ne Yesu akũ. Bisui Yesu ne towẽ kame, bekpã ye benado ne Pilato awe.

^{II} Awã naa, Pilato via Yesu kĩ, “No nye Yudafõ Legã a?”

Yesu bi ye kĩ, “Oo, fola nde ayekĩ òle a.”

^{III} Basofonokõẽ a le foletsa pii bitsua Yesu onukpẽ. ^{IV} Foesũ Pilato buki evia ye kĩ, “Oláakpa kale a mbuaye? Tse foletsa a kĩ belamena katsua kate ne no akũ a.”

^V Leme Yesu tábuki ebinya onukpẽ ade Pilato kena saa a.

Pilato Kõ Yesu Wuda Koto.

^{VI} Kateli nye kateli, ne Wuda Katẽ luwi kanya kame a, Pilato afone oti moa ne abãã kola bawane a kame, kĩ Yudafõ via a awe kakpa be.

^{VII} Ne lokõ a na kame a, onyole odi kĩ bave Baraba waa kola mo bati bebã badi. Bati a yidza bedza ne Roma Abãã akũ ade bekõ bati ne foe kame a.

^{VIII} Kĩ bati kodabu a kpõta a, bivia Pilato kĩ ekena seme kale kĩ yawe kakena kateli nye kateli a ekpa be.

^{IX} Evia be kĩ, “Miáwe kĩ nfone Yudafõ Legã a awe nkpa mi?” ^X Pilato via fukĩ kitonekĩ enyina yededeede kĩ lineke sũ mo basofonokõẽ a koa Yesu bido ne ye awe. ^{XI} Leme Yudafõ basofonokõẽ koa bido ne bati kodabu a kame kĩ bivia Pilato efone Baraba mbom awe ekpa be.

XII Pilato buki evia bati kɔdabu a kī, “Kekõ litsa miawe kī nkɛna oti a kī miawe kī Yudafo Legã a?”

XIII Ade bebɔa fɔwɔla bibi ye kī, “Bɔa ye nɛ asendua akũ!”

XIV Pilato via be kī, “Litsa tɔkpa ɛkɛna?”

Ade be flee bebɔa fɔwɔla kɔɔba kī, “Bɔa ye nɛ asendua akũ!”

XV Pilato wɛ kī yakɛna nɛ bati kɔdabu a kawɛ akũ ɛkpa be, foesũ ɛfɔnɛ Baraba awɛ ɛkpa be, ade kī ɛfõ sodzafɔ bo Yesu paa mɔ mpile biyu a, ɛkɔa ye ɛkpa sodzafɔ a kī bɛnaabɔa ye nɛ asendua akũ.

Sodzafɔ a Di Yesu Nsekuo.

XVI Sodzafɔ a kpã Yesu biwomɛna nɛ abãã ɔnɔkɔẽ a tɔtɔ a lowabe, ade bevɛ sodzafɔ nkɛ a bɛyakpɔta a. **XVII** Ade bekɔa lima ngbã atadiɛ wulaa bido ye, bɛnɔ fɔtsɔlɛwɛ lobɔɛ betsa ye a. **XVIII** Adeke bekawõna ye kī, “Yiiduu! Yudafo Legã, lidzi nkpã gɛlɛlɛ!” **XIX** Bibo ye nɛ lolɔ mɔ otse, bitua tanɛ biko nɛ ye akũ, ade bike aduli bekɛna fɔlɔ bekpã ye a. **XX** Kī bidi ye nsekuo biyua a, bɛnyɛ atadiɛ ngbã a nɛ ye akũ, bimuniki mɔ ye mɔawɛ tide bido ye. Ke liti a, bekpã ye bɛnɛmɛna kī banaabɔa ye nɛ asendua akũ.

Bebɔa Yesu Nɛ Otse Akũ.

XXI Kī banaa a, betselamɛna onyole odi kī bave Simon kī eto akula adi kamɛ yanaa ɔmato kamɛ. Ade sodzafɔ a hɛ ye kī ɛtɛ Yesu asendua a ɛlɔ a. Simon kī to Kirenɛni ɔmato a, ade ɛnyɛ Aleksandro mɔ Rufo ɔlɛga a. **XXII** Bekpã Yesu bɛnamɛna kako kadi kī bave Golgata, kī foe kayɔ nyɛ oti lolɔ fɔtsõ. **XXIII** Ade awã bekpã ye waĩ kī

betskamɔ otsonu kī yadina akū kawo kī emɔa a, lemɛ Yesu támɔa be. **XXIV** Sodzafo a boa Yesu nɛ asendua akū ade beta bavulibi nɛ ye tetadie akū bemó ekī yaanya odi nɛe odi ade a.

XXV Bɛboɔa ye nɛ asendua akū nɛ ɔnɔnɛ tɔdɔũ evedi kamɛ. **XXVI** Ade betsele ye onukpɛ katsua foletsɔ bɛboɔa nɛ ye lolɔ nyange kī, “Yudafɔ Legã a.”

XXVII Bɛboɔa bayekpane nviã lemɛ nɛ asendua akū bibumɔ Yesu, ɔmɔa nɛ ye sɔmɔna, ɔyade nɛ ye sebã. **XXVIII** Nɛ osi kī akū, letsɔ a kī betsele nɛ Katsɛle Kpalɛwa a kamɛ a ya nɛ foe kamɛ kī, “Bibu ye bido nɛ tɔkpa bakɛnanɛ kamɛ.”

XXIX Bati a kī bekatɛ a kpɔkpa folɔ ade bivūna Yesu kī, “Ao! Nɔ a kī ɔlɛ kī aaveli Asoli Kɔla a obuki oke kɔbɛbã nɛ fuwi elale liti a nɛ awī a? **XXX** Duma nɛ asendua akū, kanye nɔ akū!”

XXXI Ade ayea Yudafɔ basɔfɔnɔkɔɛ mɔ mbla batsanɛ a lemɛ di ye nsekuo bekabi akū kī, “Ɛtɛ bati bɛbã nkpã, lemɛ yaápuli ɛtɛ ye mɔawɛ akū. **XXXII** Mifɔ Kristo, Israelfɔ Legã a eduma nɛ asendua akū finyaa bɔmɔ lokɔa bɔtɛ ye budo” Ade bati nviã a kī bɛboɔa nɛ asendua akū bibumɔ Yesu a, lemɛ vūna ye a.

Yesu Ku.

XXXIII Kī suwa tɔdɔũ ewua-nviã boɔa a, katinya kamɛ flee ke ɔtū, kenawo tɔdɔũ elale kamɛ. **XXXIV** Nɛ tɔdɔũ elale kamɛ a, Yesu boɔa fɔwɔla kɔɔba elɛ nɛ Hebri tide kamɛ kī, “Eloi, Eloi, lama sabaktani?” Foe kayɔ nɛe, “Yī Baguma! Yī Baguma! Litsa sū ɔfɔnɛ yī awɛ?”

XXXV Bati a kī bedzē ne awā a badi nu letsa kī ēle a, ade beē kī, “Mitse! Yave Baguma Onukpē Ōnyene Eliya.”

XXXVI Be kame ōmōa wula atse enabōe kanyinya butubu ōsapō kī edo ne waī mō ōnye kame ade edela mō otse ekpa Yesu kī emōa a. Ade oti a kale kī, “Midza, mifō bōdā nte Eliya aaka eyaanye ye ne asendua a akū!”

XXXVII Yesu buki ebōa fōwōla kōōba ade emena onukpē a.

XXXVIII Ne lōkō a na kame pe, Asoli Kōla lima kpale a kī litsua koe kame a bē ne kayite, kito nyange keyawo kayō.

XXXIX Ade kī sodzafō ōnōkōē a kī edza etselamena asendua a nu Yesu fōwōla kabōa mō ayekī eku a, ēle kī, “Nuwī fōane kī oti kī nyē Baguma Obi.”

XL Batsole badi lemē dza mō lugo bekadā. Be kame badi nyē Maria Magdalani, Salome mō Maria kī ye babi nyē Yakobo obisēde a mō Yose.

XLI Lōkō a kī Yesu na ne Galilea, ade be lekatomō ye bekabumō ye a. Batsole bebā pii kī bitomō ye bēya ne Yerusalem a lemē na ne awā.

Yesu Kabila.

XLII Fōtsa kī flee ya ne luwi kī lenya Kaweya Luwi a lōtō. Ne olobe lōkō a, **XLIII** Yosef kī eto Arimatia ōmatō a ya. Nyē oti kī edeī obu ne fōletsā badzene a kame, ade edzi yadā Baguma Legākanyakō a kaya ane a. Yosef do ōwōle enaa Pilato sekē eke ye aduli evia kī efōne Yesu ōnōkpa a awe ekpa ye. **XLIV** Fōkena Pilato wāwā kī enu kī Yesu ku kōkōe. Foesū evē sodzafō ōnōkōē evia ye kī nuwī Yesu ku kōkōe. **XLV** Ade kī ōnōkōē a bi

ye ɔnɔkɔali a, Pilato kpa Yosef osi kī enaavenya ɔnɔkpa a.

XLVI Ade Yosef naya aklala, ade kī enavenya Yesu ɔnɔkpa a, esuli ye ne lima a kame. Ekɔa ye ewola ne linike kī benye ne de ɔke kame, ade emilinya de kpale ebale linike a onukpẽ a.

XLVII Maria Magdalani mɔ Maria kī enye Yose ɔma a dza bekadā, ade bemó awā kī bekɔa Yesu ɔnɔkpa a bibila a.

XVI

Yesu Yidza Eto Banɔkpa Kame.

I Kī Kaweya Luwi a wūna a, Maria Magdalani, Maria Yakobo ɔma mɔ Salome benaya kluboũ kī banaatsela Yesu ɔnɔkpa a. **II** Ne Ekwansieda ɔnɔne tutuutu a, kī suwa de a, biyidza benaa linike a akū.

III-IV Kī banaa a, bekavia akū kī, “Owei aamilinya de kpale a ne linike a onukpẽ ekpa boe?” De a pɔne lububu paa. Kī bedzela ane bedā a, bemó kī bimilinya de a biyi ne ɔwẽ kɔkɔɛ. **V** Foesū biwo ne linike a kame. Adeke bemó opopo odi kī edo atadie wulaa fitaa edzi ne somona semake, ade beɔa oblia.

VI Opopo a bi be kī, “Mitavila. Yesu Nazaretni a kī beɔa ne asendua akū a, miawe. Eláa awī kī. Eyidza edzi nkpā! Midā, ade awī bekɔa ye bewola a. **VII** Minaabi ye fɔtsa bakolene a mɔ Petro leme kī, ‘Yesu nyaa mi loto yanaa Galilea, ade awā míamɔ ye nde ayekī ebi mi eyi a.’ ”

VIII Foesū batsole a ne bilo atse bedzakū ne linike a ɔwẽ ne libe mɔ kukūtila kame. Betábi odima kadima kitonekī bekavila.

Yesu Nye Ye Akū Etsa Maria Magdalani.

^{IX} Kī Yesu yidza eto banokpa kame ne Ekwansieda onone tutuutu a, enya loto enye ye akū etsa Maria Magdalani, kī ye kame eblomena hūhū kpa evūkonon etomena a. ^X Ade ye lenabi bikī bitomō Yesu tō a foletsa a. Bati kī dzi bekabe ayolohon ne ye wuda a akū. ^{XI} Leme kī Maria bi be kī Yesu yidza edzi nkpā, ade kī emó ye malo ni, betáte ye bido.

Yesu Nye Ye Akū Etsa Ye Fotsa Bakolene Nviā.

^{XII} Fukī liti a, Yesu nye ye akū etsa ye fotsa bakolene nviā kī Bito Yerusalem banaa akula, leme betámō ye biyi osū ne kayokayi a. ^{XIII} Bimuniki benabi be nkae a, leme be malo betáte bido.

Yesu Nye Ye Akū Etsa Fotsa Bakolene Ewua-odi a.

^{XIV} Ke liti a, Yesu nye ye akū etsa fotsa bakolene ewua-odi a kī bidzi banya. Leme ekā be ane kī betána katekado, mō kī bena ato osī, betáte bati a kī bemó kī ye edzi nkpā a leme bido a.

^{XV} Ebi be kī, “Minaa katinya kame flee minaale Kale Wī a mikpa batidziwa flee. ^{XVI} Odi nye odi kī ete edo, ete mui kawola leme ni, baate ye nkpā, leme odi nye odi kī etáte edo ni, baako ye koto. ^{XVII} Baguma aakpa bate badone a kobē bekena awāwā fotsa. Baablomena hūhū kpa benemena ne yī dī akū, baale tide vōē. ^{XVIII} Ade nte bipi kōe iye bemōa otsonu kpa ni, foláakena be letsama. Nte bite awe ne basone akū ni, baana akū osī.”

Baguma Bōe Yesu Enamena Ode.

XIX Ke liti a, kī boe ɔlate Yesu le kodzela mɔ be eyua a, bebɔe ye benamena ne ode ade enadzi ne Baguma somona a. **XX** Ye fɔtsa bakolene a nale Kale Wī a ne kako nye kako. Boe ɔlate a kena adzuma mɔ be, ekɔa awāwā fɔtsa a kī bekakena a ete de kī be fɔletsa a nye onokɔali.

Baguma Apam Vɔɛ a Tuwuli
Tuwuli: Baguma Apam Vɔɛ a Tuwuli New Testament
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

68df0193-2981-5275-8994-8f743fe01e5e